

南康縣志

題發  
高  
清  
岳



上九卷 編一



南康縣志第一編卷九藝文志

藝文


藝文志昉於班固漢書紀書名卷帙及著作姓字而已後世編其體例諸郡邑志列藝文於後凡前誌撰述掌故及文之有關於政治民事風土山川者咸錄焉世積而事繁事積而文繁於是書數恆處十之三蓋紀言之文與紀事之文並可相輔而行也康邑舊志人物例繁一小傳而藝文士女仍附列傳本可無庸贅錄第寫志登之王志沿之有增無減未便遽刪姑仍附諸簡編云

一論辨類

章江考

清蔡恆繼

章江之名由來舊矣而諸書說多異同大抵皆彷彿臆見觀其流未溯其源也有謂章江出豫章南瑩縣者秦欽之水經也有謂出高都山者山海經也他若前漢地理志則謂豫章水出贛縣西南北大江後漢郡國志謂贛有豫章水劉欽所註又云豫章湖漢及贛並通也雷次宗豫章記云贛州豫章水出郡西南故以名郡雖千川均流而北源最遠故獨受名焉劉澄之云贛縣東南有章水西有貢水二水合贛字因以名縣而酈道元駁之





以劉氏而以字說水不知其實要之諸書所載亦皆近似而未詳如所謂岳都山者果安在耶蓋山高而大在南安郡之崇義縣其上多巨木雲氣蒙茸下有清泉紺碧噴發如大易所謂山下出泉者總之山澤通氣以致雲雨故山下之泉初出如斗漸大而成溪過郡之南是名橫浦由是順流而下經鳳凰城凡幾十曲繞蕉溪出芙蓉渡至贛之南復西北而流合贛城東之貢水是爲贛江則劉澄之以合章貢爲郡者亦不謬但以貢水在贛章水在東則謬矣如山海經所謂出岳都山者亦不謬若省會古名豫章郡者或以是歟而應邵漢官儀謂郡南松陽門有樟樹垂蔭數畝郡得以名則誣也至若門號章江舍岳都山所出者則別無所謂大約古人著述多出於耳聞未親歷其地即或歷其地而無古先碑碣以志其原則亦無從詳考甚矣地輿之大山陬海澨茫茫無際即挾飛仙以遨遊八荒亦且難窮况居一隅耳自有限操三寸不律欲窮溯源流於楮墨間不幾管窺之見哉

### 章水經流考

清李崇禮宜人

江右豫章之水有宋蘇子軾考定禹貢所謂南江也蘇子之定以豫章爲南江蓋祖自鄭康成康成謂岷江至彭蠡並與南合始得稱中第禹貢載導潯潯江兩條雖皆會於彭蠡只言北江中江而不及南江故後釋三江者多不然鄭氏及蘇子之說率採取漢晉後圖吳越方輿家偏謬一曲之論而於大川經絡反遺蓋嘗推溯四瀆自開關以來經南僚者

未有如江之大且遠彼漢出岷冢至大別江出岷山至東陵分流各二十里所入所過類非一水及既合並仍分謂之北江中江者從其經流方地名之使不混也豫章一江雖尋源近在嶺北流止江右數州邑境內不若彼發源梁益者之橫衍中區爲禹跡所得紀然自今南安之岳都山出潯流直下凡一千九百八十里亦與彭蠡爲滙至潯陽而始合大江中間漢湖諸川所入亦不下十數故鄭氏因經文兩江皆會合彭蠡輒逆得經意而蘇子解禹貢三江定以此爲南江亦顯著導潯兩條江既有北有中則便有南也設南僚經流岷江漢二水可盡則神禹奠川出自岷冢之漢定爲北江出自岷山之江即當列爲南江不曰中江矣但其曰中江者非讓豫章經流之水爲南江而何第神禹當日治水獨北僚之河用決用疏施功最博次則濟河淮泗諸流分合導之儲之備載於册南服之江則自開關至今清深廣駛順軌安行亦更無他改徙故於荆揚兩境僅載九江彭蠡爲下流所納畜而其上游經由之道概不悉及非特待以今之豫章前此僻在荒服故略之也惟其禹迹不經導川不載故後來豫章置郡所說亦人人殊有以木名之者則如應邵漢官儀引豫章郡樟樹連理生於庭中是也有以水名之者即雷次宗本豫章之名著自水經是也以木名者其謬妄不待辨以水名著據水經贛水出豫章南楚縣西北過贛縣東漢之南楚實統今南安郡因邑在封內班氏漢志庾仲初圖經取證以爲即豫章江蓋漢初



立郡時本以此水發源同遠又其經流直達徧歷郡地故名之耳乃附會者因其自彭蠡入江輒復牽引左傳吳楚交兵之豫章數處爲是水下流所委遂至雜入於淮右江北諸地名同而實去愈遠則皆由不審豫章一水其發源與經流孰在而妄執見聞以質之也大水經雖後漢人撰然其條例諸水原委宗自山海經山海經有云贛水出焉都山東北流注於江入彭澤西岫郡山今考圖屬南安崇義縣西南與大庾接界在古並南楚地山高百六十仞迎互四十里上有猴崗獅子之巖攢峭壁立路僅如鳥道朝夕雲氣滂鬱盤礴無峯不洞無洞不泉章水諸源漢出其間其色紺碧初出如斗漸大成溪從此屈曲迤演至沙溪崗南行轉東入自郡西石陂頭復折而南經今郡治橫浦驛五板橋邊合大小沙五板橋水下東山麓而始浩大此與班志所載之彭水仲初所謂大庾橋水名異實同即皆章水正源焉顧山海及水經皆不云章水而但云贛水亦以其流經於贛言之耳實則章水從其發源至贛流行將五百里始繞出贛城之西而贛別有湖漢一水自閩之長汀發源入瑞金會昌境橫迆雩都而繞出贛城之東乃所謂贛江章貢雙流會合治北鬱孤臺下晉劉凝之故謂以字名縣也然則章之與貢東西顯分道里隔別若論豫章取水名郡之義其直下彭蠡則章爲經流而貢特旁附不可以章混入於贛也但漢初置豫章領縣十八贛雲南楚俱處荒僻其地或彼此互入故圖經相沿未得其真而並以爲贛水

班氏雖知正名爲豫章水而又但謂出贛縣西南至別稱南楚縣爲彭蠡水所發東入湖漢水則曰彭昌章不過湖漢等九水之一是又反以湖漢之貢水統章水矣蓋漢時人率不辨章水原爲經流但知豫章有湖漢九水俱入彭蠡遂誣以湖漢爲十川之控引致地形分合成述亦並差誤今當取江右諸川之分流遠近而皆歸入於章水者明之章源從南安郡治下東山之麓合漢口靈岩和溪蕉漢諸流東北趨南康水始澄澈深爲芙蓉江在今邑治之南復東流折北環邑治再東行以趨南壘口南康在晉宋尙稱南楚故鄆道元注水經以爲南生縣北是也而其西有長沙桂陽所出之猶水益聚水自上猶江入之崇義南源大嶺峻山諸水並東流趨符江口入之郡之北境豫水又東歷南坑會蓮塘梅江之水至南壘口合之後始又逶迤東北行至贛而會合雩都東來之貢水是則不特湖漢一水入章並其上流引合虔郡以東發自甯都梅川安遠廉川以及龍南興國桃澗二江之水類無不知以章爲向若矣夫章流雖發自峒壑居民傍山墾田山迴水峻沙石狹之以下然其源從高注瀉本自清於貢水於其流出峒江北趨潭口壘如碧玉可證也惟貢來自閩之長汀地平上疏藉諸漫溪雜湊爲源記散而贛則自金雞石貢川所經其上又別受酒口所匯之衆流從龍逕龍頭南下信豐兩岸盡高峯崕呀夾峙石齒錮利與相吞搏灘名十數聖塘灘瀨之險殆不是過故從此入贛並合章流直下水嶺以至



萬安也白波捲土濁浪排空舟子重加怖懼况復沿江巨石鱗次森立逆截奔濤橋柁爲取道元所謂贛川石阻水急行難頗波委注六十餘里則今大十八灘是已迨乎出灘而之平地始東北行其萬安以西則龍泉左右溪水入焉勢既寬衍經流益大以肆又北行經泰和而下吉陽則泰和禾水自永新江西入安成發源之廬水又自安福江西北橫入叶納湖漫幾於無際而其下停滯淵深前代吉州文獻又實鍾聚於此其又東北逕吉水文江則永豐上下二廬之水自東入焉吉水於漢晉爲石陽地永平分廬陵別立石陽廬水西者可證也經又云又東北過漢平縣南又東北道新淦縣西新淦古巴邱地淦水所出漢平置縣今不可考然據鄒道元注載有率水出宜春縣東逕吳平爲即舊之漢平則當在今峽江至云率水又東逕新淦縣而亦注於豫章江今不詳其道然宜春有南水自來列在九水之一考袁江從州南東行歷分宜新喻至臨郡清江東南始北折以趨大江則章率水亦其支流斜出固與梅京舍蛇溪並當水門之衝所以樟樹一鎮關係水防尤要是袁臨吉三郡之水又皆以章匯聚矣從此章水經流直下豐之劍江勢如萬馬街奔故豐邑沿江馬湖諸墟藉以橫制其突而其東則受羅富二川之水又北至樵舍生米潭豫章郡今爲南昌治則東之盱水黎水發自飛猿血木嶺逕廣昌南豐界西北流至撫郡合臨川汝黃之水自南入之別有武陽水鄆子諸湖之水又分出自東注之其發之自

金谿湖之蜀水又東逕康樂望蔡建成橫下而自西注之此水一名錦水其或以蜀爲濁康樂本古陽樂今爲萬載配注水經所謂濁水出故陽樂者是也從此趨白社南塘逕谷鹿語州洪濤巨浪泊天繞城之西爲章江蓋本流自贛又行九百里經流全匯於此故南昌郡城爲省治以此水名門焉從此又北行鄆氏注水經載其逕津步王步左尉解椒邱城以至鄆陽縣則出餘汗之餘水注之而又與鄆陽之鄆水合謂之慨口湖漢昌邑王徙封海昏地也而上繹一水東逕新吳縣至此入焉艾之修水又自其北入焉修水鄆注以爲循水出艾縣西東北逕豫章本漢中平年所立永循名之也而後自懷玉上饒弋陽諸川復西行逕瑞洪分繞東西鄆湖至饒之康郎山以下官亭其全流悉與章合勢則是洪信饒三郡之水無不以章爲匯歸故遂名爲彭蠡所謂周迴四百五十里浸兼四郡之境不減洞庭夢澤之積在江漢而禹迹紀於揚州者亦遂以此爲稱首也蓋自是豫章之江始於彭蠡混合爲一言彭蠡不可言豫章鄆康成當日雖未必至吾江右要其所指獨自不謬焉而從此章之全流逕趨南康星子直下江州潯陽併匯潯之九派經大小孤山石門馬當橫枕屹峙而始出彭蠡之口以合岷之大江水經所云北過彭澤縣西北入於江其時九江尙未建郡故但以彭澤統言耳鄆氏於入江注固以爲大江南贛水總納洪流東西四十里清潭遠漲綠波凝淨而會注以江川可謂悉得其實特所云十川同臻一潰



疑亦約舉成數耳其實江右諸川分流無論遠近皆歸一豫章之一江固不盡於十也即考自劉歆所言入彭蠡者九水今取班氏地理志載按圖審之若南臺之彭蠡都之湖漢新淦之淦宜春之南經其上流者止四水其若盱若蜀若修若鄒若餘五水又不過從其下流逸會於全江支川所併合既已遺其大半考古今江右水道者本不足徵信况又誤以湖漢之水統章而謂九水皆入湖漢乎道元生長北方而於考據江右支分之水所出所入亦屬有條理不紊獨其於大江經流或以豫章言或又以湖漢言是不免猶依遠班氏之指而不據信圖經以確宗一說惟雷次宗主豫章而別之於贛是謂十川均流此源最遠故獨受名然後說水經者有所依據而不惑若一統志於南臺則又舍岳都之章而以別之良熱水爲豫章者當之謂漢立郡名以此是又與以章水爲出自郴州之宜章因以章名者同其謬妄曾不知章彭之遠發岳都與蟠岷正等今江省治西所以表名章江在是即蠡尾湖所以崑名漢者其義亦取於是余故率古證今詳按水經及酈氏所注參之前代建置郡邑之輿圖經左右者以證茲流之分合而後知蘇子特表信酈氏定以豫章之江爲南江其說確不可易南江之說定則以訓釋禹貢之三江庶幾大川脈絡井然可尋而凡自漢晉後圖吳越方輿家僞謬一曲之論紛紛異指其亦可以廢已夫

章水考

黃 玟

峴崙山脈自黔來者至崇義縣西南九十里起岳都山始入江西境岳都舊屬大庾明正德間王文成平橫水桶岡二寨設崇義縣以屬焉故地志或載大庾也山綿亘四十里界湖廣之郴州自西而東襄江西而表楚粵水流郴州者爲郴水入湘江而達洞庭水流粵仁化者爲錦溪入滇江而達南海水流南安者爲章水合貢水而匯彭蠡江西之水章源最先故爲經焉山海經曰岳都之山諸水所出經水出之諸水宗經水故云諸水也源岳都東行七十里納大庾之涼熱水水二源一涼一熱寰宇記作良熱水昔名豫水漢名郡豫章以此又東五十里至南安府兩城對峙章貫中流橫浦橋跨徹若聯璧躡東山之趾納梅圃之沙河又東北百五十里歷小溪新城至鍋坑塘入南康界納蕉溪水蘇子瞻所謂蕉溪問試兩前茶也又東六十里至縣城南當年兩岸芙蓉故此亦號蓉江又東北三十里至洋江口納崇義之河田水又三十里至潭口又四十里至湖頭湖廣桂陽之猶水領崇義之圍帶水合焉故此稱三江口也又五里入贛界又二十里至黃金渡又十五里至贛城西東合貢水是爲贛江北行歷吉安臨江南昌三府西納吉袁臨瑞諸水東會撫建廣饒諸水同匯彭蠡而達於江此江西水之所以以章爲經也

無名樹說

盧 擇 元 邑 人

春而榮夏而茂秋而隨冬而枯木生性然也松柏之後彫竹之凌寒梅之化於雪中超乎



凡木而非凡木之所敢並庭有樹焉莫知其名根不深幹不固枝葉不蕃既非輪囷堅厚之質而又當風霜剝蝕之餘蓋生意或幾乎息矣雖然天之生物莫不以生之理賦於物而物各得以生而物之能遂其生與不能遂其生天亦退處無權聽夫物之自葆其生之性自養其生之氣自引其生之機自達其生之象以生於天地之間而天固不忍戕之天亦不能限之天並不得私之而佑之也而茲樹何獨不然且夫無名者無用無用者以無用爲用茲樹雖枯老落而不致厄斧斤燬爨殆亦善全其天者則生意幾乎息猶幸生意之未盡息也况剝復者自然之運消長者造化之公冬盡而春已胚寒極則煖已伏及夫東風解凍百物昭蘇茲樹詎有不生者獨是樗焉而方枘亦微矣槁焉而復萌萌亦危矣蟲之食也鳥之啄也牛羊之牧也童穉之折也其生意仍息而或者畏其生之難過時而弗加之植冀其生之速先時而且助之長又或疑其土之瘠也屢遷其地而本爲之傷又或驗其枝之生與枯也數爪其膚而心爲之伐雖欲生之實以害之而何能生之有其惟勿憾於天勿咎於人勿鹵莽於力所不逮勿踈急於時所未乘吾第培其本而柯葉觀其自新吾第蓄其精而華實任其自榮既無一暴十寒之患始有潛滋暗長之機浸假而祥和扇則歲蕤逗綠浸假而雨露膏則葱鬱連青庶幾可望其垂條而挺節蔽日而干雲也夫樹之名萬大者堅者尤棟樑之任柔脆者細而屈曲者亦皆可爲器用其他花可

玩果可食芳餌可齋清陰可蔭無用者也所懼朽腐則眞無用耳茲樹雖無名而苟得生之時徐俟其生之暢也其何以凡木自棄也哉

瑞芝說

沈恩華

同治庚午十月學署西齋隙地產芝草一本是年熊司訓聯珠應省闈被放而康邑諸生應試幾二百人無一人獲薦者羣訝芝之無所應而生也余聞之曰何訝也天下淺近之事休徵在耳目前發驗即在耳目前若積之厚者流自光往往久之又久久始予人以符驗孟子曰五百年必有王者興其間必有名世者何其言之遠而確也且夫休徵必以科日爲應亦近世忘本逐末之說耳熊司訓之言曰入爲孝子出爲悌弟此家之瑞也內而行成外而名立此身之瑞也必舉科日以爲瑞將漢唐以前未設科目又何自而驗休徵哉司訓品端學邃日以射行孝友爲諸生式諸生苟遵循而勉之焉則芝草之瑞將來必有非常之驗而豈僅科目哉即科目又何不可驗哉爲識數語以解諸生之疑兼以質諸司訓

二序跋類

南康地輿圖記

申綬芳

余嘗遊覽天下山川之勝峴峴開闢結爲都會鄉鄙繡錯雖廣風氣固同北地平少山江



南則山水秀麗南康隸嶺北界東粵之交此非古稱巖邑者耶舟車輻輳俗慕而土沃道  
宋元改革之際戶口井屋盡耗於兵匪僅今日四境荒煙已也余授事以來夙夜經營安  
集一二遺庶與之休養誠以創業之初天地復元山川且效靈焉將見人物勃興肖形而  
蕃矧新朝以天下爲家富獨百里凋殘不被休澤哉嗚呼當昔全盛人肩相接塵閉撲地  
乃忽一朝殘破觀世變者能無興亡之感耶披覽斯圖應知首開牧民未易勤厥職也

感恩祠集序

陽明王  
公生祠

賴 馳

天子十有二年丁丑春詔以大中承陽明王公巡撫江湖閩粵四省屬府專以平寇爲急  
至之日開府於贛悉檄藩臬重臣暨屬吏二千石以下有謀略者與議議定然後行事不  
急攻不緩縱誓吾必勝之威待其必潰之勢從容於庭戶之間而威已騰於溪山千里之  
外矣越秋公遂親往由是衆皆感激爭先趨赴一鼓而破之執訊獲醜盡平其地百十年  
盤據之窩所恃而禍吾民者至是悉除功成遣出南康邑之父老子弟迎於草野稽首言  
曰往年寇賊出沒無常攻陷我城邑剽掠我鄉村不幸而死者無可控愬幸而存者恐亦  
不知死所矣今者何幸得生死而骨肉也既舞忭而喜因追感而悲如赤子之見慈母遂  
相率請公像而祀之公不可而民不已又相率詣公府固請之公愈不可而民愈不已乃  
得畫工之良者於拳號固請之餘竊神而熟寤焉歸而貌之頗得公之外者而公弗能禁

也像成卜地於學宮之傍祠焉拜祝有堂牲庖有所籩豆滌濯之具備於民者有常規模  
鼎立當與學宮相悠久矣夫公之勳名在天下德業在朝廷天子嘉之史官書之銘鼎彝  
被聲歌光昭百世又豈係於祠之立與不立哉蓋民固常懷懷於有仁吾民幸而同時者  
得拜公於道次而愬所懷後吾生者樂樂利利於百世之下食公之賜不識公面寧不致  
憾乎是祠之立繫吾輩之思亦將以愬後世之思也祠成而士民歌咏之聲瀾瀾洋洋衆  
集成編馳謹序以弁其端云

送王龍谷太守入覲序

姜 寶

昔孔子謂君子不器又謂君子可大受不可小知竊以爲器者局於用之謂不器者不局  
於用周於用之謂而可大受不可小知者則猶似局於大小爲用而未能用於用之謂也  
嘗因是疑其說有不合既而思之又竊以爲不器自君子而言可大受不可小知自人之  
取君子言以君子用無不全而人之取君子者不當求其全於用如此也然則聖人之說  
未嘗有不合而君子者可大受亦可小知誠周於用非局於用者矣此不但今人所難即  
當時亦謂難得而見此孔子之所以嘆也若我郡大夫龍谷王公殆所謂其人歟公自倅  
姑蘇來守吾潤也初聞廉潔自守能幹濟成事功又能堅持法人不致以私干請如是而  
已不謂公能進於是更遠大而不可量也先是歲遣當與直及商販木過江由關者例有



和入之資且千金名充公費而實歸私囊蓋從來然矣公盡革不取釐毫人以是稱公廉公謂故已然創非自我是廉而不欲有廉名也郡中有謀不軌者跡已露事未舉也公則捕其黨而消弭其芽孽屹然能定大亂於聲色不動問臺司欲當叛逆也又能執不可具奸黨獄以上能保全千百生命免門誅而口未嘗言功有定亂功有保全千百生命功而皆不欲言功也文武生今年舉賴公得舉者類溢倍且半公實有文武才能身取士人方爲公稱盛公嗾然不自以爲盛也夫公有三大美而皆不居如此古所稱清畏人知者非公歟古所稱無智名無勇功者非公歟噫嘻公則信可大受矣若欲以小知公亦未嘗有不可也蓋公自聽斷箋奏以至利弊之興除自期會簿書以至米鹽之靡密無一不躬親亦無一不精明而詳盡也然則古所稱矜細行勤小物者又非公歟人知公可大受可小知可當君子之不器能若此然不知公之所以能若此得之學問之力居多也公鄉里先輩有念菴先生者嘗講聖賢經濟之學而公及其門實爲先生高弟則公平日所得於先生者深矣以文學之長施之於政事此固孔門假商求由之所不能兼而公能有之者歟於乎公在今其真人所難能今方求才之時大計後尤求大才以大受之時也非公其孰能當此選歟予師荊川先生與羅先生爲道義友兩先生門人亦如通家子道義一脈每相通予幸以此受公知亦自幸知公於公之行義不容無所以贈而邑父母紫亭甘公適

以此請尤義所不得而辭也遂忻然書諸卷令持以送公見公之學有所本故能周於用稱不器以冀公大受於將來敷布遠猷確有徵於天下不僅虛美於語言云

送王雲主赴象山主簿序

彭漢

南康王雲主將赴雷波府象山縣主簿余携樽酒至舟中飲之察其志頗抑抑不自得將別奮袖而起曰昔陶淵明州召爲簿不就躬耕自資其後爲令卒不能爲五斗米折腰而去士君子磊落軒天地安能隨人俯仰與世浮沈博此斗升祿乎予謂簿散官也署閑庭也雖俗吏而無吏俗之拘苟隨其地植木種竹日哦其間高固依然在也君固依然在也一行作吏實與隱處者無異君又何必效淵明之去而始爲高哉往矣若予者簿書鞅掌日奔疲而未有已實不能無愧於高士也

南楚鄉賢嘉會錄後序

蔡一清邑人

歲庚寅冬余南楚鄉賢嘉會錄刻既成峽仰峯王君任通少山賴君資遜叩余蓋桂山房謂余宜有言序諸末簡余曰嘻二君所以敘祖德賢諸鄉獻當年肇祀之自與夫今日置業贖祭之田亦既言之詳矣一清復何言哉雖然茲錄也一以彰祖德一以昭君恩一以敘少長一以敦友誼固不具焉是不可以無言夫彰祖德也昭君恩也叙少長弟也敦友誼信也一錄之設而孝弟忠信之道固不具焉茲錄之刻所以不容已也則嘗論詩



而得之詩曰高山仰止景行行止又曰無念爾祖聿修厥德願與同會諸公以孝弟忠信之道共勉諸身而無忝厥祖則景仰之志切修德之心殷庶可稱嘉會而祀典亦永有賴矣二君復謂余曰子之言遠矣他日史氏必有採而錄之者而豈曰私祭無關於國典哉

陽玉巖遺翰序

江西楊 愚

士君子出膺民社匪徒皇皇以簿書期會爲務凡至一邦則必訪求文獻放失者網羅之幽滯者闡揚之於以鼓勵末俗推廣教化其所關正非尠少也海寧陳公香泉以畫省望郎一麾出守初得黔之石旣再補豫章之南安甫受事即謁濂溪道源書院登鐵漢樓憑弔劉元城張無垢兩先生之遺跡慨然欲修復之過南康得宋國子博士陽玉巖遺翰於其裔孫某卽爲較刊行世香泉旣自爲之序又請予文弁其首余惟學先修德政貴端本行先之在宋隱居著述不求仕進迨楊龜山先生代郡守草奏表薦於朝遂以八行見徵聖書襄美旋卽解組告歸居玉巖以老比東坡先生自海外北還過嶺相遇賦詩贈之且贊其像非行先有過人之德其能致名賢引重如此耶宋元以來官斯土者欽崇雅範類有歌詩序記以表章之其子孫錄而藏焉然歲久浸就湮沒矣香泉至郡汲汲於興廢墜舉而首以行先爲標的則其政之所重亦可知矣西江素推理學文章之藪如行先者當不乏人安得風雅好事如香泉者數輩參錯其間相與發潛德之幽光樹後來之儀表若

賈長沙所謂易俗移風者咸於是乎在豈徒流傳辭翰而已哉余甚樂香泉之有是舉而復馳言以爲天下勸

四書精要自序

林作棟 邑人

四子之書垂道統於既沒俟後聖於無窮張子所謂爲天地立心爲生民立命爲去聖繼絕學爲萬世開太平皆是道也顧其微言奧義以集註而明復以俗講而晦大全集萃言而斐然淆亂後儒雖有發明然猶醜疵並列卷帙浩繁故聰俊者能徧觀而常厭其雜遲鈍者弗領悟而常苦其繁於是因陋就簡舖槽啜醢如備旨體註闡注直講正解彙解者卽爲俗學原其意蓋不以爲道學之淵源而視爲富貴之捷徑惟欲苟成以速侔科名故謬戾相沿老死莫辨於程朱書及先儒著述皆謂迂闊難窮而相戒勿省斯道安得而不晦哉夫形上之道不外形下之器彌綸宇宙而不離日用聖人以言傳之而無一不統具於心程子謂中庸一篇爲孔門傳授心法然大學論孟皆傳心法也法者天理之當然天以是命人人以是爲心寂然不動者心之體渾然一理居安資深而溥博淵泉已立天下之大本法之不偏不倚者所謂中心爲忠也感而遂通者心之用泛應曲當左右逢源而時出遂爲天下達道法之無過不及者所謂如心爲恕也博文與盡心知性卽擇善之智道之所以明也約禮與存心養性卽固執之仁道之所以行也明新止至善卽篤恭而天



下平智仁至勇之所以造其極也學問思辨致知格物也戒懼慎獨正心誠意也中和位育修齊治平也合四子之言而釋其旨趣觀其會通無不同條共貫互相發明其有出於心法之外說堯舜以來聖聖相傳至吾夫子而大集其成故心法之傳歸之孔門程子生孟子之後得千載不傳之學朱子繼前聖之緒會衆說而折其衷精微之旨集註已該迨良知之學起於明之中葉顯叛朱子而邪說異論迭相倡和其似是而非者皆云從註而實已背註則蒙蒙然家適戶守而信爲固然矣是顯叛者易見其謬而似是者莫覺其非也我朝聖神天授德業日新紹孔孟程朱之傳繼堯舜禹湯之治誠人文宣明正學昌明之會也伊川論學謂必先明諸心則讀書窮理斯爲急務棟於聖人之道媿未能躬行而有得誦其言而勃然以興想其人而恍然若接幸生隆盛之時承程朱之後倘惑於俗說四書本義且未明諸心則所讀何書所窮何理隱微奚以自慊爰不度荒陋體味白文以求其端涵泳集註以咀其旨參考或問語類以辨其異同博採先儒時賢之說一準白文集註以爲去取反覆展玩數十餘年然後刪其繁而取其精融會其說而撮其要並附鄙意手錄成編以授兒輩使知聖道昭明皆吾心所自具無事求之濫博使目眩而意迷而一二同志閱過拙之苦衷爲付梨棗嗟乎心所同然聖惟先得曠世相感應有傳人操何敢肆其狂妄自昭霄睨但懼俗講承訛深爲集註之益尙幸心源可溯思竭一得之愚尤

望海內君子共究其蘊庶疑義盡晰斯道復明將眞儒善治古不得專美於前也

虛學治古文叙

楊錫 敏甫

文一也而有時文古文大約散行與排偶異其體又帖括之文爲制科所必需而散行文如書傳序記說解碑銘之類非經生家所急故士自束髮受書卽學爲時文以應舉講究揣摩每不遺餘力古文則非天才英艮力能兼及者多置而不論而吾友虛學治先生生平獨喜爲古文余與先生交自肄業豫章書院始時在院諸人皆學使者拔取高等送入意氣才華爭相雄長每一會課恥居人後卽旁觀者亦以等第先後爲技藝高下而先生淡如也竊年旣乾手著古文一編自先秦兩漢以及唐宋元明究其源流別其家數尺寸模仿而爲之每一文成必與二三知己共相商訂以求其是而後已焉其於時文反在所略雍正癸卯先生舉於鄉而攻古文益力當計偕北上頭頓車中猶不廢誦習幾與歸太僕之朗誦曾南豐文無異噫亦可以知其業之精矣先生屢試禮闈未獲一遇暮年思得百里而試之乃留京候揀遲滯窮愁疾亦隨之數年而先生竟長逝矣乾隆乙丑歲余在京時先生嘗以古文一册命余叙當時未有以報命繼是每一念及卽悽愴於懷不能執筆如是者十數年古人於諾無宿而余乃遲之十餘年余負先生多矣茲以檢點篋筒見先生原册始拭淚而弁數言於簡端將寄先生子若孫使付劄副俾天下後世知先



生於古文非苟作者並以暴余之蹤跡歲月爲世戒也

謝蘊山前輩詠史詩序

吳錫麒

立乎千載以下溯乎千載以上年代牢落聞見傑池方群四壁華離其黑白雜組五色剝銷其元黃而欲咀嚼宮商抑揚南董作史家之外乘開詩學之奧津緣綜萬端囊括羣有厥要有二曰識曰才神照乎先自包著察之用視返於內有謝離朱之功是以持領振裘貴提其要懸鏡程物莫匿其形否則遊赤水而握元珠登泰山而迷白馬惑矣力積於實乃有負聲之飛氣運於虛遂成伏綵之發是以長鯨擊海鳴吼皆驚羣龍競春光色自耀否則歌皇華而升清廟被諸於而入九衢爾矣蘊山先生而際舊臣麟臺老輩肆長書而練志綜洞記以研心證渡河之文能知己亥定廢山之業別作陽秋所撰西魏問嘗觀續遺兩廐疏前載思摘齊之有道謂貫非之非難約年經國緯之編爲海立雲垂之詠音宣鐸舌響叩鐘膺轉寒暑於毫端寓褒誅於腕底著詠史詩若干首確與秦楚之際筆削相承上下堂陛之交章卑有別若觀火若列眉儲儲然眈眈厥製可謂盛矣覽者竊有感焉同使道穆成鳩紀綿提挺登櫟檮蠹者無改綯鬢聞首者依然則亦其絕言提俱遊化始已耳即或狽獠漸變酒闕終開鬼號蒼帝之臺神授黃靈之籙而治日方永泰階自平帝曲彈絃民歌華壤古來之樂常屬爽鳩大德曰生無呼者咒又何至屢換已成之局別開

非想之天窮宙合之新奇供謨觴之斟酌也乎而乃市多霧集切有灰留黃星見而真人輿壇雲飛而降旗出往往輪贏似奕消長同潮龍戰能豪蝸爭亦健洗兵之雨徒望乎天河脫劍之風難希於王者爲之上觀天意下驗人時白馬南來青螺西去龍虎乃關中之氣草木皆山上之兵信鋒鏃之由生倏蟲沙之已化豈獨千秋廢學興嗟暨子之名一抹斜陽憑弔將軍之樹已哉况復前修可奪得失之故如林顯迹堪尋治亂之源若燭九變復貴而擇之必先一錯鑄成而悔之已晚故當泰運將啟靈輿甄上有抱蜀之君下有首公之臣申魚水之歡合雲龍之契甘霖應手赤日當心玉笄無驚金甌不玦何其盛也及夫蒼鵝之登已兆銅駝之泣方萌酒勸天妖琴橫凶席詩能作讖佛不授災積慘慘於人痾極悽悽於帝鬼或童昏之主而婦寺玩之或中智之君而權佞誤之必使鳴鳥不聞芳草見刈墮長城於閫外摧隆棟於朝端忠臣義士之魂都歸碧葬瓦解土崩之禍并及着生此觀者所爲傷氣迴腸驚歎頽息但思濁酒之澆而不顧唾壺之碎也先生智珠善記古尺工量抉皮裏之書製胸中之錦全鈎祕隱旁晰沈疑不嫌組織之勤惟以勸懲爲主雖復形勢簿領續美句宣而公事纒問吟箋已設一燈搖雨如夢古人萬葉呼風忽來好句丹梯翠壁突兀起於目前紫風天吳曲折移於紙上一以爲考古之鏡一以爲饋貧之糧金石聲流波濤吻縱斯可謂識之明也斯可謂才之博也屬以移蒞山右入覲京師



念下走而枉存出新編而督序愧乏三冬之用快聆九夏之宣翻世上之曰科小言敢擬  
借君家之履齒幽徑或通聊助引嗶不同修禱論百官之宮但恐面牆得數日之留已踰  
閱市固宜傳鈔未畢禿盡柔毛所冀剗劓重看讀從剛日

謝蘊山小學考序

錢大昕題

六經皆載於文字者也非聲音則經之文不正非訓詁則經之義不明爾雅一編肇始於  
周公故詩贊仲山市之德則曰古訓是式宣尼告魯哀公亦云爾雅以觀於古厥後七十  
子之徒叔孫通梁文諸人澗有增益如張仲孝友瑟分間兮謔浪笑傲之類是也後儒執  
此數言疑爲漢人綴集各出新意以說經而經之旨去之彌遠矣自倉頡創作文字而黃  
帝因之以正名百物古之名今之字也古文籀篆體製雖變而形聲事意之分師傳具在  
求古文者求諸說文足矣後人求勝於許氏拾鐘鼎之墜文既眞贗參半逞鄉壁之小慧  
又誕妄難憑此名爲尊古而實戾於古者也聲音固在文字之先而即文字求聲音則當  
以文字爲定字之義取於篆形聲相加故六書惟諧聲爲多後人不達古音往往舍聲而  
求義穿鑿傳會即二徐尙不能免至介甫益甚矣古人之意不傳而文則古今不異因文  
字而得古音因古音而得古訓此以一貫三之道亦推一合十之道也漢志以小學入六  
藝略後之志藝文者莫不因之秀水朱氏經義考博稽傳註作述源流最爲賅洽而小學

獨闕好古者有遺憾焉方伯西康謝公蘊山枕藉經史博綜羣言早歲覽書東觀得闕金  
匱石室之藏既而典大郡陟監司公務之餘鉛槧未嘗去手每念通經必研小學而古今  
流別議論紛如乃遵秀水之例續爲小學考頃歲領藩兩浙人和年豐海埔綏靖文淵閣  
頒賜中祕書職在典守時得寓目乃出舊稿參以新得分訓話文字聲韻音義爲四門爲  
卷凡五十既成以大昕夙有同嗜貽書見示讀之兩閱月而畢彬彬乎饒穢乎采摭極其  
博而評論協於公洵足贊聖世同文之治者乎夫書契之作其用至於百官治萬民察聖  
人論爲政必先正名其效歸於禮樂與刑罰中張敞杜林以識字而爲漢名臣賈文元司  
馬溫公以辨音而爲宋良相然則公之於斯學固有獨見其大者因文以載道審音以知  
政孰謂文學與經濟爲兩事哉

小學考自序

謝啟昆

古者書必同文政先正名小學爲經義王政之本故自幼習書計至於成人授經三年而  
通一藝三十而五經立爾雅出周孔之徒以正名物三倉急就迭興而汝南許君集其大  
成孫叔然受業北海鄭君門人始作翻切學者務極其能於是音訓之書備焉蓋小學本  
附經經漢之七略藝文梁隋之七錄經籍皆然秀水朱氏撰經義考有功經學甚鉅但止  
詳爾雅餘并闕如吾師翁學士覃察先生作補正又欲廣小學一門時爲余言之余惟國



家稽古右文廣收載籍彙爲四庫全書羣經之後次以小學教讀諸書即謹載焉郁乎盛矣乾隆乙卯啟昆官浙江按察使得觀文淵閣中秘之書經始采輯爲小學考後復由山西布政使移任浙江從政之暇更理前業成書五十卷卷首恭錄教讀次訓詁則續經考爾雅類而推廣於方言通俗文之屬也次文字則史籍說文之屬也次聲韻則聲類編集之屬也次音義則訓讀經史百氏之書訓詁文字聲韻者體也音義者用也體用具而後小學全焉大戴禮記魯君欲學小辨以觀於政孔子曰爾雅以觀於古足以辨言是小學通于爲政經術致用之儒必有取爾矣助爲輯錄者桐城胡徵君度及甯海陳鱣餘所學士也時嘉慶戊午季夏越五年壬戌重加釐定乃付板削焉

李青來圖天圖說序

山西 盧元偉

天地變化日出不窮要其大端理數二者盡之而言理者每略乎數存其大致而已與之探隨索隱剖析毫芒其義立宰於是爲之說曰六合以外存而不論也六合以內論而不議也噫嘻果毋庸論議乎哉亦論議之著於無據也吾人廁身兩間仰首而見天舉步而見地此亦耳目至切近之事而局於耳目者以謂天似覆盆地如平板及詰以何歷萬里而總戴天心登五嶽而不相觸見則惑之至於日輪遠大近小之疑月行內陰外陽之異則滋惑之甚無他不明其數即莫測其形因莫究其理憑虛以求無徵不信何怪然哉竟

典四命實爲言天之祖而測地之事見焉何者宇內地東南盡海西北廣漠無極今觀鴨夷南交宅抵海濱則西與朔方亦必爲大西極北之境古人蓋嘗親履其地以施測量非如後世言天家僅據空文爲想當然之說也或者謂宅其官而非宅其地則未然余稽古力少又無閱歷異聞胸積羣疑無從叩實逮宦粵遊東適舊友黃樺平明經亦僑寓省垣龍王廟相與過從偶談及月行九道意欲製爲一儀以顯迹象時廟中李道人在座乃言西法星月別有次輪致爲明顯可毋泥古人九道云云也因爲繪圖列說而後逗留伏逆之跡乃得瞭然且復推廣引伸作七政地球諸圖說積久疑團一旦得豁道人言此皆其師得之西人傳之者有口授而無章句且云西人之學務爲徵實凡所測驗類多從親歷目覩而得故其學詳於數而簡於理余雜宇宙間一切事物數大於理時行物生日新審變而總範圍於三百六十五度之內理固爲數固也此書精析確徵明白曉暢宜廣其傳俾初學按圖玩索釋彼俯仰之感道人遜謝以爲傳述齋聞恐言之無文貽譏余鄙余笑謂之曰言惟其是而已奚計工拙且鄒衍談天鄒奭雕龍古人已不必兼長矣遂爲之略加刪訂卒慙懇付梓適人名明徽號青來番禺人性澹遠不妄交善寫山水人物洋畫線法尤精

亦香吟館詩集序

余有成 崇義人



詩有可解有不可解得其可解乃精得其不可解乃妙本諸志以爲言可解不言之言不可解即其言以成聲可解無聲之聲不可解因其聲以諧律可解無定律而無往非律不可解夫古之爲詩者治性情通氣化其披諸管絃也移風易俗格神祇馴鳥獸盡其難矣三百篇後代有作者氣體風格各殊而寫意以運筆亦自有其爲志爲言爲聲爲律而入於可解不可解之中予友香芸爲予甥女夫其詩淵源家學生平尤鍾好於此而肆力焉予遊閩時香芸買竹林蔗香明府適邀之浙遊嗣明府由浙遷閩旋復遊閩而浙遊閩遊二草已登梨棗方郵寄時札屬予序其全集以授梓人全集予殊未悉見且予於此道粗淺即悉見亦未必能盡解聞此集會極蒙欣賞於法梧門先生梧門先生一代宗工以爲可傳斯尤可傳矣安用予言予惟即所解者言之而已浙遊閩遊二草實全豹之一斑請即一斑以窺全豹卷首特紀慈訓祖澤未遑父書可讀湖詩之源也卷末殿明府官戒恤民課農訓士懲役匪詩之歸也慈訓之後繼以課兒詩官戒之前先以夜夜作課兒詩云文章同鸞簪客夜作云事業酬君父其志可知矣父書兒讀二卷中不時廻顧明府官戒二卷中一路鍼線浙遊草則輕輕拖起閩遊閩遊草則節節承上浙遊其律可知矣其自書武林雜作後云好爲不根談喜作翻案語其言不拾人牙慧矣其聲之壯也近杜其聲之爽也近李其聲之清秀而自然也近謝近陶知二草之志則知全集之志知二草之律

種杏山房詠史詩序

黃之晉江蘇

則知全集之律知二草之言與聲則知全集之言與聲至其味外鹽梅空中色相爪搔麻姑角掛鈴羊則繡出鴛鴦金鍼離度當自索夫解人予何言哉予何能解哉其可解者以解解之其不可解者以不解解之云爾

世稱杜少陵爲詩史夫史自史詩自詩二而一之可乎解之者曰詩與史非有二也尙書者史之祖而有舜皋五子之歌古輶軒所采藏於國史氏故詩者史官所爲微特魯史克作頌而已詩亡然後春秋作故南雅諸什者西周之史而隱桓紀年則東周變體之詩也秦漢以降詩與史分兼之者祇班孟堅沈修文寥寥數子若范陳桃李之倫有史者率無詩詩家巨手如昌黎不獲操史筆至通鑑作而李杜姓名並從蓋闕矣吾故知此事之古一而今二也二之突而又一之者其後人詠史之所由作乎論其世知其人誦古人詩當如是即吾自作詩何必不當如是抑其體又有辨有爲四言若宋人史學提要者此類書派非可言詩有號稱樂府若李西崖九西堂諸家者實則古樂府音久失傳今以有韻之文代之謂詩可謂史之論贊亦可謂真樂府則不可有爲五七言斷句若王新城若沈欒城七子者是其體宜官詞宜權歌宜柳枝竹枝若詠史則莫如七言律體唐人詠懷古蹟金陵懷古等作其權輿乎然而比事之難也以四十賢人例之則五十六字必上滴列宿



下眾雲臺諸將而後可號七言長城抑必才學識兼有三長而後可以史爲詩亦即可以詩爲史何必少陵曩有皖孝廉汪某郵詠詩四冊皆詠史而集唐者嘆其苦心爲唐堂香屑竹垞蓄錫之流亞然千腋成裘勢不能天衣無縫者是亦巧者之憾也年來饑驅走轅獲交朱君子冰手一編索序攜歸旅舍挑燈讀之甫一二首拍案稱快愈益讀則愈益大快是時因病止酒者經年忽得下酒物亟呼大白且飲且讀讀盡二百首飲盡三數斗則聞鶉聲一再號而余且陶然醉眠不知此身何者爲憂患也君之言曰某魯讀紫陽綱目苦健忘故約讀而識之始漢及宋前後乎此者不暇及也詩有美刺史兼善惡今第取名臣碩儒庸行高節而奸佞雜流概不與者誌景行也然鄙人竊讀而怪焉世間千眼萬眼看史千手萬手作詩匪君一人也何以入君之眼出君之手迥非千手眼萬手眼之所同看而同作也且鄙人平日亦曾看史多欲言未吐而君乃先吐之此二百首者何時躍出我之胸中走入君之腕下耶此其所以讀而快快且怪也君籍南康鄉先輩謝蘊山中丞曾有此體詩三百首以視之其合璧乎積薪乎當世有定論夢其非東家之壘而壽陵之步則斷斷然突頤者康令石君以邑志事唾譏鄙人志者史之支流也鄙人曷克勝此然特此邦耆舊中有熟知文獻掌故如君者當呼將伯而與有成焉詩之史耶史之詩耶二耶一耶鄙人不能言請還之君君如不言乎請實世之讀君詩者

### 周易晉窺序

郡守吳式芬

易爲卜筮之書聖人即事寓教因之推天道以明人事焉漢魏以降易說日難言數者流爲讖祥言理者雜八佛老自宋儒專明人事而易始爲切于日用之書顧聖賢之理愈闡愈深惟觀象玩辭於先儒之說能疏通證明而不流於支離穿鑿乃爲有功經訓南康賴任夫先生以名進士歷宰大邑所至有政聲退居林下依然儒素精研經義以訓其子若孫鄉之人推爲宿望予自己亥承乏南安即耳先生名辛丑之冬有事洪都道出南康始識先生時先生年已逾八十貌溫言粹望而知爲有德君子問出所著易經管窺問序於予受而讀之其析理也近而明其立言也簡而該以經解經盡掃紛紜轆轤之見凡吉凶存亡足爲人事之鑒別者多所發明復博徵古事以證之洵合乎聖人寓教之旨然後知先生立身行政其有得於易者深矣吁天下之理備於易學者苟能由先生之書以進釋乎聖賢之微旨則以之行己可以免尤悔以之應事可以識從違以之臨民經世隨所處而各當其位豈僅爲經生已哉

### 書張氏雙烈婦傳後

訓導熊聯珠

節烈重於今古節難節而烈尤難若節烈萃於一門尤難之至難者也張烈婦黃氏儒童昌信妻林氏其從子承紹妻先後均以節烈著事蹟詳邑侯沈公雙烈婦傳吾讀之而重



有感焉夫天地之性人爲貴自陰陽判而賦乘之異母教之承於是乎有保全節行各得其正者無富貴賤長幼一也故坤之用六利永貞詩之柏舟矢靡他聖人著之於經其作春秋於紀伯姬之類大書特書者非以從容就義慷慨捐生此偉丈夫之所爲乃於巾幗中得之不羸雖哉然曠世而遇一人異地而徵一事求如張黃氏林氏者世不多觀非天之生是使獨其實優其教成也然則雙烈婦者是殆得坤元之正氣允爲千秋懿軌又豈徒樹範於張氏一門已夫論曰南楚風尚敦氣節若蔡邕之不屈忠而烈者也盧仝之殉母孝而烈者也至婦人女子宋劉氏沈江自溺則貞而烈今張氏一門雙烈與夫俱死則節而烈也膺當世之褒嘉而流傳不朽諒哉

南康縣學修河跋

賴 聰

天地儲英山川孕秀人傑所由生也詩曰保茲天子生仲山甫又曰維嶽降神生甫及申古今名言良可驗矣今茲巒宮門面大江其別出之涪流會大江者其勢當西亦秀所在近年乃決而東固氣數之或然亦人事之使然也今邑侯恭公紳首捐俸倡其義率凡慕義之民併力樂助築堤捍之使復故道庶幾山川之秀以完天地之英以燭賢才輩出科甲聯登維那家于百年之光厥功不亦偉哉

書宗伯手卷後

學政姜 士昌

潤州固多名二千石迺龍谷王公冲宇曹公肥爾范公接軫以操行孤廉著尤奇矣士昌里居十餘年數爲敝里人士言三公宜亟祀名宦且特祠尙似有待也士昌來南州偶著學篋首檄高安祀范公於晉宗已復如南安請祀王公而王公之子選貢以礫持先宗伯贈公卷示士昌士昌泫然流涕題而歸之真獨悲先宗伯手書宛然如昨而竊嘆王公領郡功德最著偶失一屬吏意耳竟調去曹公早死且無子也范公廉吏名稍章顯亦早死夫天道於三公尙不可知若是過人事爾莽又何問哉王生第珍護此卷世有良史隄焉纂次廉吏遺事則茲卷猶可考也

三奏議類

代庠守薦陽孝本狀

宋楊 時

臣猥以非才謬當郡寄竊惟事君之義莫尙以人而不祥之實蔽賢爲大苟有所知臣敢不勉伏見郡有處士陽孝本學富行純爲輿論信服義遊京師一時忠義之士多從之學短褐不完飯疏飲水而束脩之饋悉以市書捐載而歸自晦巖穴不求仕進鄉閭故舊憐其貧協力周之非其義不受也此雖古人操履無以過之當路柄臣亦嘗論處然久未蒙旌擢伏望聖慈不以臣言之輕特加收采錫之一命以稱朝廷尊德勵善之實

政治盜賊二策疏

王守仁



據江西按察司整飭兵備帶管分巡嶺北道副使楊璋呈奉臣批據南安府申大庾縣報正德十二年四月內被鞏賊四百餘人前來打破下南等鎮竄被上猶橫水等賊七百餘徒截路打寨劫殺居民又據南康縣報鞏賊一夥突來龍句保擄劫居民續被鞏賊三百餘徒突來坊民郭加瓊等家擄捉男婦八十餘口耕牛一百餘頭又有鞏賊一陣擄劫上長龍鄉耕牛三百餘頭男婦子女不知其數又據上猶縣申被橫水等村鞏賊糾同逃民四散擄劫人財續據三門總甲蕭俊報鞏賊與逃民約有數百在於地名梁灘擄牽人牛本月十六日准本縣捕盜主簿利昱牒報鞏賊劫打頭里茶坑等處駐劄未散已關統兵官縣丞舒富等前去追剿賊已退回橫水等巢去訖各申本院批兵備道議處回報案照四月初五日據南安府早同前事彼時本院見在福建漳州督兵未回未知前賊向往行查未報又查得先據南康縣申稱上猶賊首謝志珊糾合廣東賊首高快馬統衆二千餘徒攻圍南康縣治殺損官兵已經議委知府邢珣等會勘失事緣由早報外續該兵部題咨巡撫都御史孫燧會同安贛都御史王守仁將前項賊犯謝志珊等量調官軍設法剿捕務期盡絕應該會同兩廣鎮巡官行事照例約會施行題奉欽依轉行查勘前賊見今有無出沒及曾否集有兵糧相度機宜即可否剿捕惟復應會兩廣調集軍馬待時而動務要查議明白處置停當具由呈報仍督各該地方牢固把截用心防守以備不虞等

因隨奉本院案驗議照前賊連絡三省盤據千里必須三省之兵尅期並進庶可成功但今湖廣已有偏橋苗賊之征廣東又有府江猛獍之伐雖欲約會夾攻目今已是春深兩水連綿草木茂盛非惟緩不及事抑且虛糜糧餉合亟一面募兵練武防守愈嚴積穀貯糧軍需大備告招者俯順其情暫且招安肆惡者乘其間隙量搗其穴候三省約會停當然後大舉庶有備無患事出萬全通行詳去後今奉前因隨會同分守左叅議黃宏守備都指揮同知王泰查勘待南安府所屬大庾南康上猶三縣除賊巢小者未計其大者總計三十餘處有名大賊首有謝志珊志海志全楊積榮賴文英藍瑤陳日能蔡積昌賴文聰劉通劉受臨居讓陳尹誠簡永廣蔡積慶蔡西薛文高洪祥徐華張祥劉清才譚曰真蘇景祥藍浩奇朱積厚黃金瑞藍天鳳藍文亨鍾鳴大鍾法官王行雷明聰唐洪劉元滿所統賊衆約有八千餘徒且與湖廣之桂陽桂東魚黃新水老虎神仙秀才等巢廣東之樂昌巢穴相聯盤據流劫三省爲害多年所據前賊占據居民田土數萬頃殺擄人民尤難數計攻圍城池敵殺官兵焚燒屋廬盜汗妻女其爲荼毒有不忍言神人之所共怒天討所當必加著也今聞廣湖二省用兵將軍夾攻之舉亦惟其時但深山茂林東奔西竄兼之本道兵糧寡弱必須挪借京庫折銀三萬餘兩動調狼兵數千前來協力約會三



來賊首龔福全等作耗殺死守備都指揮鄧晏雖征剿惡黨猶存正德七年兵備衙門計將賊首龔福全招撫給與冠帶設爲搖官首高仲仁李賓黎穩梁景聰扶道全劉付與李玉景陳賓李聰曹永通謝志珊給與衣巾設爲老人未及兩月已出要路劫殺軍民動輒百千餘徒隨處流劫正德十一年七月內龔福全張打旗號督稱延溪王李賓黎穩梁景聰偕稱總兵都督將軍名目各穿大紅塘民擄驕展打涼傘擺列頭踏響器其餘搖賊俱乘馬匹千數餘徒出樂昌及江西南康等縣拒敵官軍後蒙撫諭將賊首高仲仁李賓給與冠帶重設搖官未嘗半月仍前出劫本年正月十六日一起八百餘徒出劫樂昌縣塘捉知縣韓宗堯劫庫劫獄又一起七百餘徒打劫生員譚明浩家一起六百餘徒從老虎等峒出劫一起五百餘徒從與街等縣出劫竊思前賊陽從陰背隨撫隨叛目今搖賊萬餘聚集山峒聲言要造呂公大車攻打州縣城池官民徬徨呈乞轉達請調三省官軍夾剿等情各備申到臣除備行江西廣東湖廣三省該道守巡兵備守備等官嚴督各該府州縣所掌印巡捕巡司把隘提備等官起集兵快人等加謹防禦相機截捕去後查得先固地方兵力寡弱既不足以防遏賊勢事權輕撓復不足以齊一人心乞申明賞罰假臣等令旗令牌使得便宜行事已經具題聞今復據各呈申前因臣等查看得前項賊徒警之疽癰之在人身若不速加政治必至潰肺決腸然而攻治之方亦有二說若陛下假臣

等以賞罰重權使得便宜行事期於成功不限於時則兵衆既練號令既明人知激勵事無掣肘可以伸縮自由相機而動一寨可攻則攻一寨一巢可撲則撲一巢量其罪惡之淺深而爲撫剿度其事勢之緩急以爲後先如此亦可以省供饋之費無征調之擾日勇月削使之漸盡灰滅此則如昔人拔齒之喻日漸動搖齒拔而兒不覺者也然而今此下民之情莫不欲大舉攻以快一朝之忿蓋其怨恨所激不復計慮其他必須南調兩廣之狼達西調湖湘之士兵四路並進一鼓成擒庶幾數十年之大患可除千萬人之積冤可雪然此以兵法十圍五攻之例計賊二萬須兵十萬日費千金殆於道路不得操事者七十萬家積粟料數月而事始集刻期專謀又數月而兵始交聲迹彰聞賊強者設險以拒敵弱者挾纒而深逃迨於鋒刃所加不過老弱脅脅從且狼兵所過不減於盜轉輸之苦重困於民近年以來江西有姚源之役瘡痍甫起福建有汀漳之寇軍旅未旋府江之師方集於兩廣偏橋之討未息於湖湘兼之杼軸已空種不入土而營建所輸四征未已誅求之刻百出方新若復加以大兵民將何以堪命此則一拔去齒而兒亦隨斃者也夫由前之說則如臣之昧劣賞懼不足以堪事必擇能者任之而後可若夫大舉攻誠可以分咎而薄責然臣不敢以身謀而廢國議惟陛下擇其可否斷而行之緣係地方緊急賊情事理爲此具本請旨



議夾剿方略疏

王守仁

據江西嶺北道副使楊璋呈稱臣案驗准兵部咨該巡撫湖廣都御史秦金題爲緊急賊情事備行計處兵糧約會三省將上猶縣等處賊巢剋期九月中進剿等因遵依隨將本道兵糧事宜計呈本院轉達奏聞定奪外隨據南安府上猶大庾等縣申稱各縣鄉民早殺將登各巢華賊修整戰具要行出劫並據南康縣縣丞舒富早訪得大賊首謝志珊號征南王剎率桶岡等巢賊首鍾明貴等約會廣東大賊首高快馬等大修戰具并呂公車要將南康縣打破聞知廣東官兵盡調府江就行乘虛入廣流劫乞要早爲撲剿等因已經呈蒙本院密受方略行委知府季敷縣丞舒富等領兵分剿共生擒大賊首陳日能等三名首從賊徒五十四名斬獲賊首級六十八顆殺死射死賊徒二百四十餘名燒死賊徒二百餘名搗過巢穴一十九處燒燬房屋禾倉八百九十餘間俘獲賊屬二十九名口水黃牛馬羊騾一百四十四頭匹通經呈報又蒙本院慮賊乘間復出行委知府季敷指揮來春等統兵屯南安指揮姚壘縣丞舒富統兵屯上猶指揮謝采千戶林節統兵屯南康各於要害去處往來防剿至七月二十五日賊首謝志珊果復統衆一千五百餘徒攻打南安府城各官督兵迎敵生擒賊犯楊樂等七名斬獲首級四十五顆賊衆大敗而去八月二十五日賊首謝志珊又統領二千餘徒復來攻打南安府城各官督兵迎敵生

擒賊犯龍正等四十二名斬獲首級一百五十七夥賊又大敗而去即今賊勢稍挫若乘此機會直搗其巢旬月之間可期掃蕩但聞湖廣之兵既已齊集而廣東因府江班師未久復調狼兵未有定期謹按地圖江西之南安有上猶大庾桶岡等處賊巢與湖廣桂東桂陽接壤交攻之舉止該江西與湖廣會合而廣東止於仁化縣要害把截夾攻不與焉贛州之龍南有洞頭賊巢與廣東龍川接壤夾攻之舉止該江西與廣東會合而湖廣不與焉廣東樂昌乳源賊巢與湖廣宜章縣接壤惠州賊巢與湖廣臨武縣接壤仁化縣賊巢與湖廣桂陽縣接壤交攻之舉止該湖廣廣東二省會合而江西止於大庾縣要害把截夾攻不與焉雖三省大舉其實自有先後舉動次第不相妨礙若不此之察必要通待三省之兵齊集然後進剿則老師廢財爲害匪細合將前項事宜約會三省以次漸舉庶兵力不竭糧餉可省等因據呈到臣看得三省夾攻必須彼此剋期定日同時並舉斯乃事理之當然兵無定勢謀貴從時三省賊巢連絡千里雖聲息相因其間亦有種類之分界限之隔利將爭趨患則相顧誠使三省之兵皆已齊備會約並進夫豈不善但今廣東狼兵方自府江班師而歸欲復調集恐非旬月所能兩省之兵既集久頓而不進賊必驚疑愈生其奸悍者奔突黠者潛逃老師費財意外之虞乘間而起雖有智者難善其後誠使先合湖廣江西之兵併力而舉上猶諸賊逮事之舉廣東之兵亦且集矣則又合



湖廣廣東之兵併力而舉樂昌謠處連事之舉江西之兵又得以少息卒則又合廣東江西之兵併力而舉龍川方其併力於上猶則姑遣人併禦樂昌諸賊以安其心彼見廣東既未有備而湖廣之兵又不及已苟幸旦夕之生必不敢越界以援上猶及夫上猶既舉而湖廣移兵以合廣東則樂昌諸賊其勢已孤二省兵力益專其舉之益易當是之時龍川賊巢相去遠絕自以爲風馬牛不相及彼見江西之兵又撤意必不疑班師之日出其不意回軍合擊蔑有不濟者矣臣竊以爲因地之宜先後合擊之便除臣遵照兵部咨來題奉欽依會兵征剿亦聽隨宜會議施行事理已將前項事宜移咨廣東湖廣總督巡撫等官知會一而相機行事外緣係地方緊急賊情事理爲此具本題知

參失事官員疏

王守仁

據江西按察司整飭兵備帶管分巡嶺北道副使楊璋呈據贛州府信豐縣及信豐守禦千戶所各報稱正德十二年二月初七日有龍南強賊突來地名崇仙屯竊已經差委興國縣義民蕭承會同信豐龍南官兵相機剿捕續據申報強賊突來本縣小河住筍離縣約有四十餘里乞要發兵策應又據申報本月初九日有龍南流賊六百餘人突至城下除嚴督軍兵固守城池緣本所縣無兵禦敵誠恐前賊攻城卒難止遏乞調峯山弩手並該縣兵夫救護又經差委南安府經歷王祚南康縣縣丞舒富統領弩手殺手前去約會

二縣掌印官並領兵官相機攻圍去後續據縣丞舒富呈本月初十日蒙委統領殺手陳禮飭打手吳尚能等共五百名經歷王祚義民蕭承統領峯山加善雙秀弩手各三百名先後到於信豐縣會剿至十一日止有該所管屯千戶林節帶兵四十餘名出城據鄉導馬客等報稱止有強賊六百餘人在地名花園屯竊當同各官將兵分布筍定只見前賊一陣止有百餘徒先出有前哨義民蕭承領兵就與敵殺斬獲賊級四顆奪獲白旗一面頃刻衆賊出營分爲三哨約有二千餘徒賊知龍南反招賊首黃秀魁糾合廣東龍川縣洲頭賊首池大鬚賊首池大安新總並池大昇共爲一陣賊首楊金巢自爲一陣勢甚猖獗卑職督統本哨兵快奮勇交鋒殺死賊徒二十餘人不意賊衆一湧前衝殺手陳禮飭百長鍾德昇等見勢難當俱各不聽約束先行漫散有南康縣報劾義士楊習舉等仍與前賊死敵不退俱被戮傷身死有經歷王祚上馬不便亦被執去賊勢得勝仍要攻城隨與蕭承林節等收集衆兵退至南營山把截遇蒙本道親臨該縣督剿各賊聞知退至牛州離城少遠至十二日前賊差人告招十三日蒙本道差蕭承前去招撫就將經歷王祚放回賊往原巢去訖等因到道備呈到臣隨據龍南縣知縣盧鳳呈稱本縣捕賊主簿周政會同鎮撫劉鏗千戶洪恩統領機兵旗軍於本月十八日前去信豐縣截捕探得強賊池大鬚黃秀魁等從鴉鵲隘越過安遠縣住筍本職督兵追截前賊已往廣東龍川縣復



回原巢剝頭去訖據安遠縣知縣劉瑀稟稱於本月十九日統領水元大石等保民兵等  
手前去龍泉等保截剿各賊遁回原巢去訖難以窮追以此掣兵回縣緣由查得先據該  
道及信豐縣所各稟報前事已經批仰該道兵備等官急調招撫義官葉芳協同石背兵  
夫斷賊歸路及調峯山弩手與南康打手人等責委縣丞舒富統領前後夾擊又看得此  
賊既離巢穴利在速戰仍仰該府急行所屬隣近官司俱要乘險設伏厚集以待及於各  
鄉村往來路徑多張疑兵使賊不敢輕易奔突仍調安遠縣知縣劉瑀星夜起集水元大  
石等保民兵一千橫接龍南邀其不備若賊猶屯信豐急自龍南直趨剝頭搗其巢穴賊  
進無所獲退無所處不過旬日可以坐擒仰該遵照施行去後今據前因參看得縣丞舒  
富承委督剿不能相度機宜輕率驟進以致殺傷兵快原其心雖出奮勇責以師律均爲  
敗事經歷王祚臨陣潰奔爲賊所執後雖倖免終係失機信豐所縣知縣黃天爵千戶鄭  
鐸巡捕副千戶朱誠惟知固城日守不肯發兵應援龍南知縣盧鳳捕盜王簿周政隄備  
鎮撫劉鐸千戶洪恩地當關隘正可防遏坐視前賊往來略不出兵邀擊千戶林節卽其  
兵力之寡似難全責究其失律之罪亦宜分受安遠縣知縣劉瑀承調追襲緩不及事俱  
屬違法南康縣百長鍾德昇等臨敵不前故違約束先行潰散失誤軍機應合處以軍法  
該道兵備副使楊璋守備都指揮同知王泰俱屬提督欠嚴但楊璋往來調度卒能招撫

前賊計其功勞可以贖罪廣東龍川縣掌印捕盜等官明知賊首池大鬣等在彼地方爲  
巢卻亦不行時嘗巡邏縱其過境劫掠又各不行乘機追捕俱屬故違所據前項失事官  
員俱合遵奉教諭事理卽行提問但前項賊徒擁衆數千變詐百出今雖陽受招撫其實  
陰懷異圖况其黨與根連三省萬一乘間復出爲患必大正係緊關用人提備之際除將  
百長鍾得昇等查勸的確處以軍法及方面軍職另行參究外其餘可項各官且量加督  
責姑令帶罪隄備各自相機行事勉圖後功以贖前罪仍一面委官前去信豐縣地方查  
勘前項殺死兵快數目及有無隱匿別項事情另行參奏緣係地方緊急賊情及參失事  
官員事理未敢擅便爲此具本請旨

### 橫水柵岡捷音疏

王守仁

據江西布按二司巡守嶺北道兵備副使楊璋左參議黃宏會早據十哨各早報到查  
得先爲地方緊急賊情事節奉提督軍門案驗備仰本道計處兵糧約會三省官兵將上  
綸等處賊巢剝期進剿奉請定奪外本年六月初五日據大庾上猶等縣申並據南康縣  
縣丞舒富呈云等因備呈本院行委知府季敷等分兵勦捕獲功早報奏聞訖又經本  
院行委知府季敷指揮來存姚璽謝昶馮翔縣丞舒富千戶林節各於要害防遏擒斬功  
次俱發仰本道紀驗解送本院稟示外云云隨奉本院分定哨道指授方略云云各營官



兵進攻去後今呈前因除將擒斬賊徒首級俱類送巡按衙門會審紀錄明白生擒仍解提督軍門處決並賊級照例梟不被擄人口給親完聚賊屬男女並牛馬騾變賣銀兩收候賞功支用器械賊物俱發贖縣貯庫外賊等議照上甸等縣橫水等巢大賊首謝志珊謝志田謝志富謝志海蕭貴樸蕭貴富徐華譚曰志雷俊臣桶岡大賊首藍天鳳藍八蘇藍文昭胡觀雷鳴聰藍文亨鷄湖大賊首唐洪新溪大賊首劉允昌楊海大賊首葉志亮左溪大賊首薛文高高誦馮祥朱雀坑大賊首何文秀下關大賊首蘇景祥義安大賊高文輝密溪大賊首陳玉珩康永三絲茅壩大賊首唐曰富劉必深長河壩大賊首蔡積富葉三梅伏坑大賊首陳貴誠龍坑大賊首藍通海赤坑大賊首譚曰榮雙壩大賊首譚祐季城等冥頑兇毒特險爲惡僭擬王號僞稱總兵聚集黨類數千肆行流毒三省攻圍南安南康府縣城池殺害千戶主簿等官流劫湖廣桂陽鄧縣宜章吉安府龍泉萬安泰和水新等縣良民子女被其奴戮房屋倉廩被其焚燒道路田土被其阻荒占奪者以千萬頃賦稅屯糧負累軍民賠納者以千萬石其大賊首謝志珊藍天鳳各又自稱盤皇子孫收有傳流寶印畫像盡惑羣賊悉歸約束即其妖狐黠風之謀固知決無所就而原其封豕長蛇之心實已有不可言比之姚源之王浩八華林之胡雪二東鄉之徐仰四建昌之徐九齡均爲賊首而奸雄實倍之今則巨魁授首巢穴蕩平擒斬旣多俘獲亦盡數十年

之禍害已除三省之冤憤頓釋悉皆仰仗朝廷憐念地方之荼毒大興征討之王師並提督軍門指授成算號令嚴明親臨督陣身先士卒以致各哨官兵用命爭先捐軀赴敵獲臻是捷擬合會案呈詳施行等因據呈到臣卷查先准兵部咨云各查照外續據領兵縣丞舒富等呈稱各寨賊首聞知湖廣土兵將到集衆據險四出殺掠猖獗日甚乞爲急處等因到臣當將進兵機宜督同兵備副使楊璋分守參議黃宏統兵知府等官邢珣等議得桶岡橫水左溪諸賊荼毒三省其患雖同而勢事各異以湖廣言之則桶岡諸巢爲賊之咽喉而橫水左溪諸巢爲賊之腹心以江西言之則橫水左溪爲賊之腹而桶岡諸巢爲之羽翼今不先去橫水左溪腹心之患而欲與湖廣夾攻桶岡進兵兩寇之間腹背受敵勢必不利今議者紛紛皆以爲必須先攻桶岡而湖廣剋期乃在十一月初一日賊見我兵未集而師期尙遠且以爲必先桶岡勢必觀望未備今若出其不意進兵速擊可以得志已被橫水左溪移兵而臨桶岡敵竹之勢不濟矣於是臣等乃決意先攻橫水左溪密切分布哨道使都指揮僉事許濟率兵千餘自南康縣所溪入知府邢珣率兵千餘自上猶縣石人坑入知縣王天與率兵千餘自上猶縣白面入令其皆會橫水使守備指揮鄭文率兵千餘自大庾縣義安入知府唐澧率兵千餘自大庾縣岳都入知府李敬率兵千餘自大庾縣穩下入縣丞舒富率兵千餘自上猶縣金坑入令其皆會左溪知府



伍文定知縣張徵候各兵齊集亦令其從南康上翁分入以遏奔衝臣亦親率兵千餘自南康進兵至坪期直搗橫水以與諸軍會而使兵備副使楊璋分守參議黃宏監督各營官兵往來給餉以促其後分布既定乃於十月初七日夜各兵齊發初九日臣兵至南康初十日進兵至坪使間諜四路分探皆以爲諸賊不虞官兵猝進各巢皆鳴鑼聚衆往來呼噪奔走爲分投禦敵之狀勢甚張皇然已於各險隘皆設有滾木礮石度此時賊已據險勢未可近臣兵乘夜遂進十一日小餉未至賊巢三十里止舍使人伐木立柵開壘設墩示以久屯之形夜使報効聽選官雷濟義民蕭庚分率鄉兵及樵野善登山者四百人各與一旗齋銃砲鈞鏹使由間道攀崖懸壁而上分列遠近極高山頂以覘賊張立旗幟薰茅爲數千窺度我兵且至險則舉砲燃火相應十二日早臣兵進至十八面隘賊方據險迎敵驛聞遠近山頂砲聲如雷烟焰四起我兵復呼噪奮進銃箭齊發賊皆驚潰失措以爲我兵已盡入破其巢穴遂棄險退走臣預遣千戶陳偉高容分率壯士數十緣崖上奪賊險盡發其滾木礮石我兵乘勝驟進呼聲震天地指揮講泉馮廷瑞兵由間道先入盡焚賊巢賊退無所據乃大敗奔潰遂破長龍巢破十八面隘巢破先鵝頭巢破狗脚嶺巢破菴背巢破白藍橫水大巢先是大賊首謝志珊蕭貴模等皆以橫水居衆險之中倚以爲固聞官兵四進倉卒分衆扼險出禦甚力至是見橫水烟焰障天銃砲之聲撼搖山

谷亦各失勢乘險走各哨官兵乘之皆奮勇力戰而入知府邢瑄遂破磨刀坑巢破茶坑巢破茶潭巢知縣王天與破樟木坑巢破石玉巢都指揮許清破鷄湖巢破新溪巢破楊梅巢俱至橫水知府唐滔破辛牯腦巢破上關巢破下關巢破左溪大巢守備指揮鄭文破獅窠巢破義安巢破苦竹坑巢指揮余恩破長流坑巢破牛角窠巢破龍坑巢承舒官破箸坑巢破赤坑巢破竹壩巢知府李敦破上西峯巢破孤狸坑巢破鉛廠巢俱至左溪守巡各官亦隨後督兵而至是日擒斬首從賊人賊級併俘獲賊屬男婦奪回被擄人口牛馬賊仗數多其餘自相蹂躪墮崖填谷而死者不可勝計當是時賊路所由入皆刊岸倒樹設阱埋簽不可行我兵晝夜涉深淵蹈叢棘遇險絕則掛繩崖樹魚貫而上猿臂而下往往失足墮深谷幸而不死經數日始能出各兵已至橫水左溪皆困甚不復能驅逐會日已暮遂令收兵屯筍次日大霧雨咫尺不辨連數日不開乃令各營休兵享土而使鄉導數十人分探潰賊所往並未破巢穴動靜十五日得各鄉導報謂諸賊分陣預於各山絕險崖壁立有柵寨爲退保之計有復合聚於未破之巢者俱不意我兵驟入未及搬運糧穀若分兵四散追擊可以盡獲臣等竊計湖廣交攻在十一月初一期已漸逼此去桶岡尙百餘里山路峻峻三日始能達若此中之賊圍之不克而移兵桶岡勢分備多前後顧瞻非計之得乃令各營皆分兵爲奇正二哨一攻其前一襲其後冒霧速進分探



急擊十六日知府邢珣攻破旱坑巢窩井巢知府李敷守備指揮鄭文攻破臨下巢李家巢十七日知府唐濤攻破絲茅壩巢十八日都指揮許清攻破朱雀坑巢黃竹壩巢觀音山巢十九日指揮余恩攻破梅巢石頭坑巢二十日知府邢珣又攻破白封龍巢芒背巢知縣王天與攻破黃泥坑巢大富灣巢二十二日縣丞舒富攻破白水洞巢本日知府伍文定知縣張戩兵亦至二十四日知府伍文定攻破寨下巢知縣張戩攻破柘州坑巢二十五日知縣張戩又破宋坑巢知府伍文定破楊家山巢二十六日知府李敷又破李坑巢都指揮許清又破川壩巢二十七日守備都指揮鄭文又破長河洞巢連日各擒斬首從賊人賊級並俘獲賊屬男婦奪回被擄人口牛馬賊仗數多是日各營官兵請乘勝進攻桶岡岳復議待桶岡大險四面青壁萬仞中盤百餘里連峯參天深林絕谷不睹日月中所產早穀著積之類足餉凶歲往者亦嘗攻坐困數月不能俘其一卒竟以招撫爲名而罷及詢訪鄉導其所由入惟鎖匙龍葫蘆洞茶坑十八畝新地五處然皆架棧梯壑奮懸絕壁而上賊使數人於崖巔坐發礮石可無執兵而禦我師惟上章一路稍平然深入湖廣迂回取道半月始至湖兵既從彼入而我師復往事皆非使今積水左溪餘賊皆已盡入其中同難合勢爲守必力善戰者其勢險其節短今我欲乘全勝之鋒兼三日之程長驅百餘里而爭利彼若拒而不前頓兵幽谷之底所謂強弩之末不能穿魯縞矣今

若移屯近地休兵養銳振揚威聲先使人諭以禍福彼必懼而請服其或有不從者乘其猶豫襲而擊之乃可以逞乃使素與賊通戴罪義官李正嚴醫官劉福泰釋其罪並縱所獲桶岡賊鍾景於二十八日夜懸壁而入期於初一日早使人於鎖匙龍受降賊方甚恐見三人至皆喜乃集衆會議而橫水左溪竄入之賊果堅持不可往復遲疑不暇爲備臣遣縣丞舒富率數百人屯鎖匙龍促使出降而使知府邢珣入茶坑知府伍文定入西山界知府唐濤入十八畝知縣張戩入葫蘆洞皆於三十日乘夜各至分地遇大雨不得進初一日早冒雨疾登大賊首藍天鳳方就鎖匙龍聚議聞各兵已入險皆驚愕散亂猶驅其衆男婦千餘人據內隘絕壁隔水爲障以拒知府邢珣之兵渡水前擊張戩之兵衝其右伍文定之兵自張戩右懸崖而下遠賊旁擊賊不能支且戰且却及午兩營各兵鼓奮而前乃敗走縣丞舒富知縣王天與所領聞前山兵已入亦從鎖匙龍並登各軍乘勝擒斬賊悉計十八畝知府唐濤之兵復嚴陣迎賊又敗然會日晚猶扼險相持次早諸軍復合勢並擊大戰良久遂大敗知府邢珣被桶岡大巢破梅伏巢破烏池巢知縣張戩破西山界巢破鎖匙龍巢破黃竹坑巢知府唐濤破十八畝巢知府伍文定破鐵木甲巢破上池巢破葫蘆洞巢知縣王天與破員分巢破水坑巢縣丞舒富破太王嶺巢擒斬首從賊人賊級並俘獲賊屬男婦奪回被擄人口牛馬賊仗數多賊大勢雖敗結陣分遁者尙多



是日聞湖廣土兵將至臣使知府邢珣屯葫蘆洞知府唐淳屯十八羅知府伍文定屯大水守備指揮鄭文屯下新地知縣張戢屯潯頭縣丞舒富屯茶坑指揮姚崇知縣王天與屯板嶺而使副使楊璋巡行潯頭茶坑諸營監督進止以繼其糧餉又使知府季敦分屯岳都以防賊之南奔都指揮許清留屯橫水指揮余恩留屯左溪以備腹心遺漏之賊而使參議黃宏留宿南安給糧餉以爲岳都之繼臣亦躬率帳下屯茶寮使各營分兵與湖兵相會夾剿通賊初五日知府邢珣又破上新地巢破中新地巢破下新地巢初七日知府唐淳又破杉木坳巢破原陂巢破木里巢十一日知縣張戢破板嶺巢破天台蕃巢十三日又破東桃坑巢破龍背巢連日各擒斬俘獲數多其間嚴谷溪壑之內饑餓病疹顛仆死者不可以數於是桶岡之賊略盡臣以其暇親行相視形勢據險立隘使卒數百斬木棧崖鑿山開道又使典史梁儀領卒數百相視橫水劍築土城周圍千餘丈亦設隘以奪其險議以其地請建縣治控制三省諸藩斷其往來之路事方經營十六日據防遏推官徐文英呈稱廣東魚黃等巢被湖兵攻破賊黨男婦千餘突往鷓湖新地穩下朱雀坑等處知府伍文定趨穩下鷓湖等處守備指揮鄭文知府邢珣上新等處各相機急剿二十日知府伍文定兵擊賊於穩下寨西寨寨苦竹坑寨長河壩巢黎坑巢二十三日守備指揮鄭文知府邢珣擊賊於上新地巢知府伍文定又追擊於鷓湖巢十二月初三日

知府季敦擊賊於朱雀坑寨狐狸坑巢擒斬首從賊徒俘獲賊屬奪獲賊仗數多於是奔遁之賊始盡然以湖廣二省之兵方合雖近境之賊悉以掃蕩而四遠奔突之虞難保必無乃留兵二千餘分屯茶寮橫水等隘而以是月初九日回軍近縣以休息疲勞候二省夾攻盡絕然後班師兩月之間通計搗過巢穴八十餘處擒斬大賊首謝志珊藍天鳳等八十六名類從賊首級三千一百六十八名頗俘獲賊屬二千三百三十六名口奪回被擄男婦八十三名口總計首從賊徒賊屬牛馬賊仗共八千五百二十五名類口隻件俱經行令轉解紀功官處審驗紀錄去後今呈前因參照大賊首藍天鳳謝志珊等盤據千里荼毒數郡僭擬王號圖謀不軌基禍種惡且將數十餘年而虐焰之熾盛流毒之慘極亦已數年於茲前此亦嘗夾剿曾不能損其一毛屢加招撫適足以長其桀驁乃今驅卒不過萬餘用費不滿三萬兩月之間俘斬六千有奇破巢八十有四渠魁授首噍類無遺此豈臣才智能逮昔人是皆仰仗朝廷威福之被廟堂處置得宜既假臣以賞罰之權復專臣以提督之任故臣等得以伸縮自由舉動如志奉成算以行事循方略而指揮將士有用命之美進止無掣肘之虞則是追獲獸兔之捷實由發縱指示之功臣等偶叨任使亦安敢冒非其績夫謀定於帷幄之中而勝決於千里之外命出於廟堂之上而威行於百蠻之表臣等敢爲朝廷國議有人賀且自幸其所遭得以苟免覆餗之戮也及照監軍



副使楊璋參議黃宏領兵都指揮僉事許清都指揮使行事指揮使鄭文知府邢昫季敦  
伍文定唐淳知縣王天與張戩指揮余恩馮翔縣丞舒富隨征參謀等官指揮謝吳馮廷  
瑞姚璽明德同知朱憲推官危壽徐文英知縣允諧黃文鸞宋路陸墩千戶陳偉高睿等  
或監軍督餉或領兵隨征悉皆深歷危險備嘗艱難各効勤苦之力共成克捷之功俱合  
甄錄以勵將來伏願皇上普彰廟堂之大賞兼收行伍之微勞激勸旣行功庸益集自然  
賊盜寢息百姓安生則地方幸甚臣等幸甚

立崇義縣治疏

王守仁

據江西巡守嶺北道兵備副使楊璋左參議黃宏會呈據南安府知府李敦呈備所屬致  
仕省祭義官監生楊仲貴等稟稱上猶等縣橫水左溪長流桶岡關田鷄湖等處賊巢共  
計八十餘處界乎三縣之中東西南北相去三百餘里號令不及人跡罕到其初嘗賊原  
係廣東流來先年悉巡撫都御史金澤行令安插於此不過砍山耕活年深日久生長日  
蕃羽翼漸多居民受其殺戮田地被其占據又且潛引萬安龍泉等縣避役逃民並百工  
技藝遊食之人雜處於內分羣聚黨動以萬計始漸擄掠鄉村後乃攻劫郡縣近年肆無  
忌憚遂立總兵管擬王號罪惡貫盈神人共怒今幸奉聞征剿蒙本院親率諸軍搗其巢  
穴擒其首惡妖氛爲之掃蕩地方爲之底寧三縣之民懷欣鼓舞如獲更生訪得各縣流

來之賊自聞夾攻消息陸續逃出頗衆但恐大兵撤後未免復聚爲患合亟三縣適中去  
處建立縣治實爲久安長治之策等因到道隨取各鄉導於軍營研審查得前項賊巢係  
上猶大庾南康所屬上猶縣崇義上保鴈湖三里先年多被賊殺戮田地被其占據大庾  
縣義安三里人戶間被殺傷田地賊占一半南康縣至坪一里人戶皆居縣城田地被賊  
阻荒總計賊佔田地六里有半隨蒙本院委領兵知府邢昫知縣王天與黃文鸞親歷賊  
巢踏勘三縣之中適均去處無如橫水原係上猶縣崇義里地方山水合抱土地平坦堪  
以設縣隨會同分守左參議黃宏議得合亟於此建立縣治盡將三縣賊人占據阻荒田  
地通行割出緣里分人戶數少查得南康縣上龍一里崇德一里亦與至坪相接緣至坪  
三都雖非全里然而地方廣闊錢糧數多堪以拆作一里合割併屬新縣其間人戶數少  
者田糧尙存招人佃買可以復全縣治既設東去南康尙有一百二十里要害去處則有  
長龍西去湖廣桂陽縣界二百餘里要害去處則有上保南去大庾縣一百二十餘里要  
害去處則有鉛廠俱皆設立巡檢司查得上猶縣過步巡檢司路僻無用宜改移上保備  
由呈詳奉批看得橫水開建縣治實亦事不容已但未經奏請須候命下方可決議兼之  
工程浩大一時恐未易就今賊勢雖平漏殄尙有且宜遵照本院欽奉勅諭隨宜處置事  
理先於橫水建立隘所以備目前不測之虞除委典史梁儀等一面暨立木柵修築土城



修建營房外查得橫水附近隘所如至坪鴈湖賴唐等處盜賊既平已爲虛設其附近村寨如白面長潭杰壩石玉過步果木烏溪水眼等處居民訪得多係通賊窩主及各縣城郭村寨亦多有通賊之人合將各隘隘夫悉行撥守橫水其通賊人戶盡數查出編充隘夫永遠守把其不係通賊者量丁多寡抽選編僉輪班更替務足一千餘名之數責委屬官一員統領當川守把遇有殘黨嘯聚出沒即便相機剿捕候縣治既立人煙輳集地方果已甯靖再行議處裁損其開建縣治本院親行踏勘再四籌度固知事不可已但舉大事須順民情兵革之後尤宜存恤仰該道會同分守等官再行拘集地方父老子弟多方詢訪必須各縣人民踴躍鼓舞爭先趨事然後興工庶幾事舉而人有子來之美工成而民享借樂之休乃呈撫按等衙門公同計議施行等因依奉會同參議黃宏遵照批呈事理先於橫水設立隘所防範不虞及行該府再行拘集詢訪外隨據府縣各申拘集父老到官交口懽欣鼓舞趨事別無民情不便等因備呈到道覆審無異轉呈到臣會同巡撫江西等處地方都察院右副都御史孫燧巡按江西監察御史屠僑議照前項地方大盜既已平蕩後患所當預防今議立縣治並巡司等衙門懲前慮後杜漸防微實該地方至計及查得橫水議建縣治處所原係上猶崇義里因地名縣亦爲相應如蒙皇上憫念地方屢遭荼毒乞勅該部俯順民情從長議處早賜施行並儒學巡司等衙門一體銓選官

員給印信如此則三省殘孽有控制之所而不敢聚三省奸民無潛匿之所而不敢逃變盜賊強梁之區爲禮義冠裳之地久安長治無出於此

#### 四書廣類

上宋撫軍書

清萬

任

恭惟執事一代偉人兩間正氣承淵源之家學擅風雅之名宗節鉞來臨撫茲江國凡所以潔己率屬造士養民極其心與力之所至無隱弗燭無遠弗周蓋四方莫不仰真清而百姓固已蒙厚福自開府江右未有岳立雲垂如我公之德澤及於生民歌思當在奕世者也乃尤以崇起教化扶正人心爲制治之本蒐閭郡乘慨念舊額祠記有裨風化者悉經兵燬未能備復檄所屬詳加確議創爲理學忠節名賢兩祠置主合祠又爲傳贊並鞞修復始末曰豫章祀紀其於羽翼道統扶植人紀興政教而風千秋真不朽之盛事如公所序言者矣而任讀公所賜祀紀竊有不能無疑者所有大節祠原祀黃練諸公十五人事核於百年之久詔舉於萬歷之初祠非私建名無冒附今忠節祠置主黃練而外止列胡公閻周公是修曾公鳳韶鄒公瑾魏公冕王公良顏公瓊王公省存十去五而彭公與明劉公瑞王公高黎公運顏公有爲不與焉則何耶將謂此五公死有可議祀所宜革耶則彭公與明黃練胡公並被連不屈死者死固彰彰也劉公端王公高並以爭孝孺獄



坐黨死者其殉孝孺要以殉建文也蔡公運則守賓州城死者守爲建文守死爲建文死可知也顏公有爲則顏公瓊子同父自盡於沛縣者死孝仍死忠也死皆光明正大而非有勉強轉轉之私專見辛除志中詳司馬萬公恭碑記無可議也舊惟范志大節祠小註偶遺王公省名未載耳厥後盧志暨陳公弘緒續修志皆載十五人即伏讀公移亦稱十五人中間有云凡已在祀典者前人必有定論而增損於其間則其事鉅其闕匪輕今所增入主既加確議以示無私而損此五公意必有說以處此雖起九原足服死者之心而傳諸久遠不啟後人之惑然後可使無端而遺之耶則論古考詳者將有忽略畢漏之訾其何以昭慎重使有爲而黜之耶不顯正其當黜之故而議者無駁詞祀者有廢主則即事原情者疑有愛憎取舍之僻其何以見折衷任向閱通志吉安人物未載彭公與明顏公有爲名而載顏公瓊小註云遺次子有爲歸不載從父死爲曲筆失實劉王兩公雖志載矣而惜其未祀於鄉賢爲缺典蔡公運本南安府屬之南康縣人志載官爵死事與原祠記諸公皆以縣名不以府名相符爲可信而南康府人物有同名蔡運者通志仍謬註祀大節祠爲可笑其陳公濬反不特書附註父大猷下爲不合今陳公得增入理學祠幸而已乃原祀二十四先生止一胡公直號廬山者無敬方胡公直也今以同名而得並祀之忠節若蔡公又有同名者而併逸之將諸公於此亦有幸不幸耶嘗歎俎豆於十世一

且而奪其蘋蘩其何以妥先靈且使來者將曰盡節如某公垂祀如某公祠更中毀幸際光復而姓氏刪沒如此無子孫之仁孝者以陳請之無士大夫之賢明者以訟言之修行砥名究歸泯滅曷益哉其何以鼓後進始任肅拜祠下指數五公無王位謂必有言於執事者不致以興廢舉墜之大典彰往勸來之盛心而輕予人以咨嗟嘆惜之妄議今視祀紀成帙而未有聞也遺之則遂遺之矣黜之則竟黜之矣故不避狂言冒鈞嚴應否補削伏惟執事裁察而明教之

五贈序類

送明懷英主簿告休序

清于

振金璫

官不論崇卑要以隨分盡職仁民愛物克行其所學如吾邑佐侯明公懷英老父臺先生武甯學博改任茲職蒞治之初接見紳士翩翩然有儒者風僉謂儒者必不諳吏治及其佐理政治屢署縣篆冤者伸曲者懲民有犯法當責者先生猶勸諭再三使其選善自新於是訟爭日希俗還醇厚戊午邑被火先生親爲查勘辦賑不假手胥役家人無溢無遺使災黎得沾實惠蒞任數十年來未嘗忤上官疲民力兩袖清風真慈祥惻悌君子也於此可見先生之活功有以行其所學耳且聞先生家居時事親盡孝與其兄思位先生同稱孝子與人交久而彌敬遇人有不給不惜解囊囊盡猶無德色鄉里稱爲仁人長者予



觀先生之愛民行政真無忝夫仁人長者之稱也已未推陞甘肅按司照磨檄下合邑士民爭相燹額以爲吾邑去此福星欲具呈請留而先生急流勇退因年屆七十決意解組歸田上官嘉其賢能將留保江南陞用先生固辭遂從其請音朱子曾爲同安主簿意在行其所學不以爲卑先生既倅吾邑陞用又弗屑就蓋壯盛義當宣力邁年義當歸田若先生者其進其退可謂合於古矣夫豈以卑位自域也耶今榮歸士民餞送哭泣待罪史館不克親與其盛因思古人於良友之將行也非徒爲燕享而已必贈之以言因擬其概以贈先生名思傑江西南康縣人

送明教諭辭卓薦序

廣信太守  
陳世瑄

余銜命來守廣信惟以率屬安民時自凜飭屬有教職一官專司課士士習端而民風以正所關尤非淺鮮非得有體有用之名儒以膺斯職何以使風會之蒸蒸日上乎上饒教諭明君東陽世爲南安屬之南康北鄉人幼即以孝友聞於鄉讀書不專事科舉業日究心於聖賢修齊治平之道故其所爲詩古文詞無不洞達原委已酉舉於鄉壬子乙卯兩科應聘江南分校文闈所得皆知名士丁巳授今職至則倡明理學與諸生勤相砥礪饒士爲文舊涉平弱三十餘年未錄鄉會今則起衰式靡示之法程一本先正自是文風丕振獲薦者多學洞漸即頽廢君設法修理更捐貲創建學習使後來者免負靡之苦亦義

舉也郡有紫陽書院士氣頗不振拔余延君爲掌教七邑之出其門者莫不爭自濯磨共歸大雅一時人才輩出咸謂望而知爲明先生弟子也乾隆八年郡饑貧民間爲攘奪余檄君往撫上饒與安廣豐三邑民君勸富者貸其鄰里民固素仰君之教化無不肅然聽命而貧者且爲富者相守望矣事竣爭置旌傘留愛君固辭三邑士民走轅以其勞上會計吏余特爲卓薦陞邑尹君以願赴禮闈不就其不安於小成如此且夫人之能文者未必其行之素優優於品者未必其才之可使至求才於教職之中尤多日暮途窮之士率迂拙苟且以充位士氣不勵民風何由丕變也若君之學足以淑世才足以有爲而復不孜孜於聲譽不急急於通顯倘所謂有體有用之儒其在斯乎可不謂賢乎抑余又聞南康爲周程子及王陽明先生過化地山川秀傑代生偉人君殆鍾其靈而起者由此從容涵養何難直探良知之闢與紹伊洛之淵源學術事功必底大成而繼美前賢矣君勉乎哉吾有厚望焉故嘉其志而序之

慈福說

游紹安

功令男婦躋百齡並請於朝得遊旌表典至渥也南康明經蔡於謙妻陽氏年八十有九歲孫新柏因太守致政將歸求題額以旌其壽余書慈福貽之蓋洪範所稱於民胞合夫諧福之物惟德是與內德所稱以慈爲最按氏鞠子四長明選弱冠入學舍儉近三十年



將貢而逝次明通諸生次明達次夢龍俱擢科今新柏復貢成均孫曾踵武遊庠是能康  
其身且克昌厥後非慈登易膺此純嘏哉氏屆期頗有日矣况四代書香一瓣氣積久必  
大發他日遊旌典膺錫命司風著或循例以徵實乎即以余言爲券也可

六規約類

南嶺鄉約

王守仁

吾爾民昔人有言蓬生麻中不扶自直白沙在泥不染而黑民俗之善惡豈不由於積習  
使然哉往者新民善常棄其宗族畔其鄉里四出而爲暴豈獨其性之異其人之罪哉亦  
由我有司治之無道教之無方爾父老子弟所以訓誨戒飭於家庭者不早薰陶漸染於  
里閭者無素誘掖獎勵之不行連屬叶和之無具又或憤怨相激狡僞相殘故遂使之靡  
然日流於惡則我有司與爾父老子弟皆宜分受其責嗚呼往者不可及來者猶可追故  
今特爲鄉約以協和爾民自今凡爾同約之人皆宜孝爾父母敬爾兄長教訓爾子孫和  
順爾鄉里死喪相助患難相恤善相勸勉惡相告戒息訟罷爭講信修睦務爲良善之民  
共成仁厚之俗嗚呼人雖至愚責人則明雖有聰明責己則昏爾等父老子弟毋念新民  
之善惡而不與共善彼一念而善即善人矣毋自恃爲良民而不修其身爾一念而惡即  
惡人矣人之善惡由於一念之間爾等慎思吾言毋忽

一同約中推年高有德爲衆所敬服者一人爲約長二人爲約副又推公道果斷者四人  
爲約正通達明察者四人爲約史精健廉幹者四人爲知約禮儀習熟者二人爲約贊置  
文簿三扇其一扇備寫同約姓名及逐日出入所爲知約司之其二扇一書彰善一書糾  
過約長司之

一同約之人每一會人出銀三分送知約具飲食毋大奢取免饑渴而已

一會期以月之望若有疾病事故不及赴者許先期遣人告知約無故不赴者以過惡書  
仍罰銀一兩公用

一立約所於道里均平之處擇寺觀寬大者爲之

一彰善者其辭顯而決利過者其辭隱而婉忠厚之道也如人有不弟毋直曰不弟但云  
聞某於事兄敬長之禮頗有未盡某未敢以爲信姑書之以俟凡糾過惡皆例此若有難  
改之惡且勿糾使無所容或激而遂肆其惡矣約長副等須先期陰與之言使當自首衆  
共誘掖獎勵之以勸其善念姑使書之使其可改若不能改然後而書之又不能改然後  
白之官又不能改同約之人執送之官明正其罪勢不能執戮力協謀官府請兵滅之  
一通約之人凡有危疑難處之事皆須約長會同約之人與之裁處區畫必當於理濟於  
事而後已不得坐視推託陷人於惡罪坐約長約正語人



一寄莊人戶多於納糧當差之時緣回原籍往往負累同甲今後約長等勸令及期完納  
應承如蹈前弊告官懲治削去奇莊

一本地大戶異境客商放債收息合依常例毋得磊算或有貧難不能償者亦宜以理量  
寬宥等不仁之徒輒便提鎖毒取挾寫田地致令窮民無告去而爲盜今後有此告諸約  
長與之明白償下不及數者勸令寬捨取已過數者力與追還如或恃強不聽率同約之  
人明之官司

一親族鄉鄰往往有因小忿投賊復讎殘害良善釀成大患今後一應鬥毆不平之事鳴  
之約長等公論是非或約長聞之即與曉諭解釋敢有仍前妄爲者率諸同約呈官誅殄  
一軍民人等若有陽爲良善陰通賊情販買牛馬走得消息利歸一已殃及萬民者約長  
等率同約諸人指實勸戒不悛早官究治

一吏書義民總甲里老百長弓兵機快、等若攬差下鄉索求齋發者約長率同約呈官  
追究

一各寨居民昔被新民之害誠不忍言 今既許其自新所占田產已令退還毋得再攔  
前疆致擾地方約長等常宜曉諭令各 本分有不聽者呈官治罪  
一投招新民因爾一念之善貸爾之罪當痛自克責改過自新勤耕動織平買平賣思同

良民無以前日名目甘心下流自取滅絕約長等各宜時提撕曉諭如踵前非者呈官  
懲治

一男女長成各宜及時嫁娶往往女家責聘禮不充男家責嫁妝不豐遂致愆期約長等  
其各省諭諸人自今其禱家之有無隨時婚嫁

一父母喪盡衣衾棺槨但盡誠信稱家有無而行此外或大作佛事或盛設宴樂傾家費  
財俱於死者無益約長等其各省諭內之人

一邊禮制有仍蹈前非者即於剝惡簿內書以不孝  
一當官前一日知約預於約所灑掃張具於臺設告諭牌及香案兩向當會日同約畢至  
約贊鳴鼓三衆皆詣香案前序立北面跪聽約正讀告諭華約長合衆揚言曰自今以後

凡我同約之人祇奉戒諭齊心台德同歸於善若有二三其心陽善陰惡者神明誅殛衆  
皆曰若有二三其心陽善陰惡者神明誅殛皆再拜奠以次出會所分東西立約正讀鄉  
約畢大聲曰凡我同約等務遵鄉約衆皆曰是乃東西交拜與各以次就位少者各酌酒於

長者三行知約起設彰善於堂上南向置筆視陳彰善簿約贊鳴鼓三衆皆起約贊唱請  
舉善衆曰是在約史約史出就彰善位揚言曰某有某善某能改某過請書之以爲同約

勸約正遍質於衆曰如何衆曰約史舉甚當約正乃指善者進彰善位東向立約史復讀



衆曰某所舉止是請各舉所知衆有所知即舉無則曰約史所舉是矣於是約長副正皆出就彰善位西向立約史書簿舉約長舉杯揚言曰某能爲某善某能改某過是能修其身也某能使某族人爲某善改某過是能齊其家也使人若此風俗焉有不厚凡我同約當取以爲法遂屬於其善者善者亦酌酒酬約長曰此豈足爲善乃勞長者過獎某誠惶忤敢不益加砥礪期無負長者之教皆飲畢再拜謝約長客拜與各就位知約撤彰善之席酒復三行知約起設利過於階下北向置筆硯陳利過簿約贊鳴鼓三衆皆起約贊唱謂利過衆曰是在約史約史出就利過位揚言曰聞某有某過未敢以爲然姑書之以俟後圖如何約正遍質於衆曰如何衆皆曰約史必有見約正乃揖過者出就利過位北向立約史復遍謂衆曰某所聞止是請各言所聞衆有所聞即言無則曰約史所聞是矣於是約長副正皆出就利過位東西立約史書簿舉約長謂過者曰雖然姑無行罰惟速改過者跪請曰某敢不服罪自起酌酒跪而飲曰敢不速改重爲長者憂約正副史皆曰某等不能早勸諭使子陷於此亦安得無罪皆酌自罰過者復跪而請曰某既知罪長者又自以爲前某敢不即戮若許其得以自改則請長者無飲某之幸也繼後酌酒自罰約正副史曰子能勇於受責如此是能遷於善也某等亦可免於罪矣乃釋爵過者再拜約長揖之與各就位知約撤利過席酒復三行遂飯飯畢約贊起鳴鼓三唱申戒衆起

約正中堂立揚言曰嗚呼凡我同約之人明聽申戒人孰無善亦孰無惡爲善雖人不知積之既久自然善積而不可掩爲惡若不知改積之既久必惡極而不可赦今有善而爲人所彰固可喜苟遂以爲善而自恃將日入於惡矣有惡而爲人所糾固可愧苟能悔其惡而自改將日進於善矣然則今日之善者未可自恃以爲善而今日之惡者亦豈遂終於惡哉凡我同約之人盍共勉之衆皆曰敢不勉乃出席以次東西序立交拜與遂退

七傳狀類

節婦吳氏傳

明劉節

節婦吳孀人者南康茂照陽君婦也二坊吳姓女妾性淑慧年十六父爲相攸以歸陽君事堂上姑恪恭有禮稱佳婦焉茂照文學君德贊子雖幼失怙而年少高才方勵精於文以世其家學孀人以名門淑媛賢以配賢添燈夜讀琴瑟方歡也乃曾未數載陽君嬰病遂至不起孀人晨夕侍湯藥日禱於神前願以身代陽君疾革謂孀人曰吾疾不可爲將負母長逝矣汝今幸有旅吾身後生女無論倘生男而汝年少爲之奈何孀人泣曰君如不諱妾知有死相從而已不知其他及陽君即世孀人五內崩裂痛哭僵仆者再皆以救而甦終不食誓殉其夫其姑吳太君亦二坊在德君女與孀人固姑姪也乃涕泣諭曰汝翁殿吾宜殉久矣所以不死者以有汝夫在今已矣固吾姑命盡之時也雖然汝今幸



有遺腹蓋少待倘天不絕汝翁後或生子吾與汝姑留此身撫之成立亦陽門宗祀不絕如縷之幸也孺人乃起視含歎遂舉健其外戶與姑同臥起朝夕哭臨夫前閱三月免身果生男姑大慰親族皆爲之喜時孺人年十九耳私念曰翁壯而殞夫長而逝此呱呱者奚足恃吾年少終不若身殉吾夫之爲安也然仰視瞻瞻者之無以爲養俯視斃者之無以爲生也乃復隱忍日哺其乳下兒事其堂上姑以庶朝夕焉當是時陽氏方貴盛夫之羣從兄弟多仕宦者如婢媵娼妓歲時聚會皆豔妝華飾或喧笑竟日孺人卽終喪亦素服屏叙珥接見之外歸房靜處不預燕樂之事雖外家戚里不踰閭行靈弔子稍長使就外傳及冠請婚名門悉佐其姑以成禮未嘗自爲政而輕窺戶外也迨新婦既入門能執婦道數年舉孫孺人年四十外矣心乃喜益率其婦勤操作盡閨內職以佐其子拓先人產業且精酒食助其子廣交遊延聲譽有古陶母風如是者十餘年子就橡考選潼關衛經歷以遠離母不欲行孺人勉之曰吾年未老孫且長矣子婦又賢汝出矣虛且一命之榮亦輪恩也何濡滯焉子既遠宦孺人代持家秉嚴而有恩養教諸孫慈而以孝如是者又復數年其子終不忍久宦遠母乃告致歸里時孺人年六十餘矣而吳太君亦八十餘猶康強有孫五人其壯者且冠婚焉嘗子榮歸日諸親族戚里大會咸舉觴壽孺人謂嗚天不負孺人貞節故居晚景而家門光大諸福必臻也閱數年吳太君以壽終孺人亦

年近七旬一夕病乃出其平生自緝縫衣巾履呼其子及婦謂曰五十載未亡人心日競競今而後可瞑目入地下報汝父矣病數日卒其子痛哭曰母貞節未經表揚而遽逝子罪奚遠耶乃發喪成禮邑有司嘉其節親爲臨弔上其事督學使者獎以額將奏之朝請旌典因事受代去不果予與其子經歷君繼志有通家好且同郡稔知其節乃據事直書爲之傳以俟觀風者採焉上達楓宸錫之旌表以嘉其貞則孺人千載不朽矣

陽孝子小傳

孫望 雅蘇門

孝子名汝貞江右南康縣人距蘇門數千里今隻身來尋其母故以孝子名也先是江右遭吳逆之變汝貞母子遂判牒無何汝貞身鬻南楚而其母吳氏漂轉蘇門傭賃李新家吳氏日夜憂戚悲泣以故鄉子女爲念新固憫憐人也見之惻然曰汝家子女果有存者吾當爲汝裁尺素書以示汝子耳遂詳述其籍貫姓氏托余兒子輩自長安寬便寄信南康然而南北關絕固難策其信之必通也即通矣而兵荒亂離故里邱墟果能必其子之在籍乎在籍矣安知子之賢否若何緩急若何嗚呼吳氏之欲歸鄉也可謂難矣未幾去年夏秋長安信果兩達南康當汝貞之分手歸楚也方十二歲耳老母幼子中道分飛天各一方其母固不知子之在楚也其子亦不知母之在楚也然而汝貞日夜思母腸幾寸斷居久之竟獲乘間歸故園震得與母重聚而其母固依然未歸於是尋母之心愈摯



頃之忽都中傳到音耗知其母寄籍蘇門悲喜交集遂隻身北來餒殍不繼徒步八十餘日竟得達鄉子母團聚且將奉其母以歸人咸曰此真孝子也爭爲詩歌以贈

朱怡松傳

主事朱錫 嚶萬安

公諱尙台字公鼎別號怡松邑庠生世居南康縣之北鄉鳴團幼而敏悟父起龍諱紹亮爲明季諸生以科舉之學訓公公輒了了然不欲拘牽章句好讀古書博名物天性尤拳父卒母許氏病且踰年公寢處必偕凡柳沐飲食及浣濯一切污穢皆躬親毫不假手甲寅兵變草寇四起公背母率家人逃贛中途望見賊洶洶至急無所措惟偕母望空默禱忽暴風雨晝晦道旁拔折樹合抱公與母及家人因得踞伏其下賊一聞而過竟獲免惟一婢子捕雞落後爲掠去次日雨雪甚衣濕人寒行經古廟中見爐柴煇烘奉母入而擁之母衣稍煖有青衣女突自旁室提甕水出撲爐火火滅凍者盡怒公周視其室閨無人乃恍然悟輒徙去未幾有後入者盡爲賊所堵始知向者青衣女蓋神也羣以爲公孝感云公少以母多病研窮醫理至吳逆之變愈究心歧黃家言嘗謂范文正公居太平無事之世猶且願爲良醫况遭亂離母素多病萬一流離棄竄之際疾痛不常緩急將安恃於是醫學益進比入贛逃民雜處人多厲疫公不忍坐視悉爲理治其貧不能支者輒傾囊以濟病者愈謝以金概弗受公雖能醫雅不欲以醫顯當路諸公惟知公鴻博咸資其學

亦未悉公精醫術時有軍門佟姓者資公學廉得公醫因無子請診視其妾公曰已男孕三月矣妻聞之妬甚一日佟外出其妻鞭笞妾至死棄之馬房佟畏妻歸不敢言竊視之猶有餘息以素知公長者遂與妾至公家公請於母率羣婢納之治愈及時果生子迨佟奉詔歸京師公悉還之其子已嶄然見頭角矣佟啣公德深故徵詩成軸貺公爲母壽其後公奉母居灑上尤孝養備至考其生平行事多善迹大抵皆出孝愛之緒餘及母卒喪塋廬墓皆極哀毀先是邑侯鄭公諱思魯最愛公詩凡酬贈多出公手既而見公性篤孝又嘗自爲詩嘉之公著作甚富稿多散佚其編集者僅有怡松行草及士材餘業各一編予嘗反復其事而歎曰事在天下惟誠可全如公向者負母逃贛屢脫於厄使非一願之誠感通幽明何遽至此記有之曰惟孝可以格天地感鬼神其信然哉其信然哉

節婦劉氏傳

節婦劉氏邑諸生明嘉詒妻也幼聰慧父應鼎日授女訓內則通曉大義及笄歸嘉貽未幾嘉詒卒婦痛絕復甦誓從地下聞堂上泣諭宜撫藐孤成立乃止姑久病婦度無愈理默禱願以身代一日於姑側刺繡針刺指血淋漓不止不自覺姑驚顧強起號哭移時而疾輒已殆所謂至誠感神者歟

林節母陽孺人傳

李 蟠



林母陽孺人者處士林高瞻妻生員林春英母選貢沐作梅祖母也少適高瞻夫婦相敬如賓有齊眉舉案風暈性純孝溫溫色養巾裙廁綸躬自浣濯萬石君孝謹不是過也孺人曲體夫志脂膏滄瀆敬供堂上無違人皆羨是子婦誠好逑也無何母年二十四而瞶病劇顧謂孺人曰吾素守家訓毫無私蓄雙親垂白爾孺乎其爲婦也又指兒言曰此呱呱者眞爾累矣倘成立勉之就學授一經爲上否則督其力耕防範宜嚴毋或隕敗家聲爾又難乎其爲母也言訖而卒時崇禎癸未年十月八日也遺孤春英甫半齡耳孺人執從亡之義欲以身殉水漿不入口者五日族婦慰母曰夫死兒在上有雙老倘奮不反顧是再死其夫而重貽堂上戚也母乃強起啜粥含悲忍淚易殉夫而謀鞠子高堂奉以周旋一無所失甲申乙酉間次第終喪春露秋霜盡物盡志是婦也而子矣迨丙戌而閩羅宋入寇焚掠村落母携兒遇寇寇奪兒母乞留兒以身受刃遍體重傷左臂幾落寇且去母憐惜仆地不省人事朦朧中彷彿偃老者飲以湯藥母熟睡幼兒亡他所時有女名佩秀者寇至之前三日依舅氏避寇山谷間聞寇退隨舅馳歸者母見母血衣重透奄奄欲絕女哭聲震地母少甦吐出湯藥氣息甘香遺曰幼弟何在是與我相依爲命者孤在吾不死孤亡吾不生也促之尋比女竟兒至母始色起因述朦朧中所見老人狀視所吐者女與男皆不識何物携之時時含喟可以止痛療寒詢及老人則形似杳然舅

乃悟爲神貽之以活母者噫苦節恪天冥冥默佑不其然乎且丙戌至丁亥風聲鶴唳驚魂不甯當是母形已瘁神已傷矣乃復有荒糧之累有差徭之苦有墜井投石之害母手口卒瘁迄無甯歲迨孤雛漸長就師教誨諸凡束脩供給皆母灌園刺指爲之即先生膳饌母自挈盥詣館門呼兒携之以入卒成其子弱寇遊泮廩食天廚爲名教文行士戊寅歲學使王君誨存選拔其二子作植作梅貢太學春英君即船廠不樂仕進而曾元蔚起尙未有艾所以燕天而昌後者母之澤蓋已長且溥矣母性寬厚族中有擠之重賊賦者母見其繫枷狼狽富隱忍受累不忍赴愬諸婦中有侵嘗無狀者氣尙未平適婦產難母匍匐扶持人曰苦固如此母何爲是母曰吾知救任婦耳他何計焉其生平慈恕類如此余曩備史館親陪宸翰學使者述母苦節於余余因情其次君爲兒子杜經師更爲詳陳頌末乞余作傳以光家乘益得聞所未聞余肅然起敬累牘志之今皇恩浩蕩加意貞廉行將上達聖聰建立坊珉維持風教母於是不朽是爲傳

節婦黃氏傳

黃 璋

天下事得之於所聞不如得之於所見之爲親切也余嘗於誦讀之下聞古貞節義烈之行斷臂投崖之事未嘗不掩卷嘆曰此其人非乘天地之正氣鍾字寅之精英決不能臨忠難而不改其心歷變故而不易其操者也此余得之於所聞而往往慨其爲難能也然



而得之於所聞終不若得之於所見之爲親切也今節母黃氏余嫡祖姑也其一生苦節貞操予不但得之於所聞而實得之於所見矣祖姑生而淑慧幼即顯連予雖聞之不能殫述年甫十四歸於陽門天君諱榮定字東白亦端方誠懇人也同心齊德稱佳偶焉世居蓉水之南及甲寅兵變乃挈家屬避亂於子鄉之淨平寨遂與我祖同寓時余亦年已十齡矣於流離患難之際我姑拮据靡甯焦勞萬狀即晨夕所需不給家室之內恬如也惟撫若女鞠若子相保相聚毫無怨言此余之所親見者也迨兵戈稍息哀鴻甫集豈無親故終以四壁蕭條悲已乃忽然而我姑竟失所天驚分鏡破傷何如哉當斯時也我姑哭泣仆地誓死相從於地下水漿數日不入口余先孀人乃垂涕泣而道之曰余亦作未亡人所以不卽死者以有難兒在傍幼女在側耳我苦命兩身一心暫留殘喘以俟他年倘得兒曹長大承先啟後亦可謝爾我之責也姑聞言念稍轉始起而謀葬具以婦道而兼盡子道此又余之所親見者也顧兵燹之餘各難自保未幾姑遂携男女復歸南水祖居就食乃又遭家不造虎視威逼勉強遷居於今住之河田堡披荊棘闢草萊拾棄穗啜粥飲水而甘心焉夫世之由苦而得甘者原不乏人獨吾姑由少而壯由壯而老歷盡苦楚而終身焉此非乘天地之正氣鍾宇寅之精英又安能經百變而不改其心歷患難而不易其操也所可惜者其長君琦吉雖獲成名浪又先節母而逝竟不能爲吾姑顯揚而

虛符百明經傳

林大 炯邑舉人

表彰之不幾淚滅無傳耶予因爲之傳以待後之君子憐其節而憫其操大爲闡揚而表彰之則余言雖鄙亦可以備採訪而免無徵不信之慮云

唐江盧氏有按崇庠康熙壬辰歲貢以子大川舉人按例勅贈文林郎知縣諱曰聲聞字曰符實生平行誼稱邑祭酒值縣大夫葛公修志乘余與邑人士諸諸大夫曰如故明經盧公某者是宜有表以勸俗大夫許之因命余爲公珥筆兒子志均又婿公曾孫女誼不獲以不文辭按公先公永教地贈文林郎知縣有厚德乃篤生公公生十日而生母廖歿越五月而嫡母朱又歿撫於從母伍公孺慕終身不啻所生從母歿愈悲思既而夢夢從母指二母示公曰若爾母朱也若爾母廖也公泣曰罔極安報母曰製衣可且語夢中形貌惟肖日爲冥衣於山凡三年諸父昆弟欣戚與同推財讓產親醉包猶有過之者遇橫逆慨然待儕輩必款款周至見美善喜談樂道有不可往復開陳義形於色窮年銳志既貢且老猶赴棘闈試平生未嘗設帳而問字者衆旁引曲喻聽者曉暢語猶絮絮自奉志淡泊年五十機絲未御而解推不倦或貸金而負或售田而復他售有急來求復應不拒姑氏適葉葉有前室子先公撫若已甥歲以近葉田租推及之先公歿公終身無改於繼母族從母族亦如之妻舅劉幼孤遭時艱歛急被繫獄公捐貲悉出之因有奪外母



志者外母不可携子女來歸後遂偕舅學舅爲名諸生切劘力也既而天復力其喪而瘞於先塋之麓鄰邑周某鳩溺水死無以殮又多官役費悉出於公其子顯以身質公曰吾豈責汝償者耶歲乙未公年六十三欲以朱子社倉法行於鄉未幾卒其子大川大柄卽於是歲捐谷八百斛以貧鄉荒越三載戊戌公妻贈孀人劉氏年六一不觴賓以存費復益社谷四百斛又三載辛丑大無所貸于二斛十亡其七大川大柄復捐米穀兼賑賑者人三日米一升糶者減半值人日米五合復貢糶麥備不足遠者銀穀兼貸約刈穫時祇償本然且有盡無負者丁未癸亥辛未米重貴升米錢十八至二十文不等共賑貸過米四千餘斛蓋凡救四大饑歲焉公既德高望重邑侯如閩公英琮王公材成皆禮尊之中公毓來渴懷數歲不見一日特于旌造焉歸喜語學論程公衛曰吾見盧秀才貌肥短拘拘莊莊誠有道何公多學於公卒爲哀詞哀之又爲序其社倉義例李公煥則閱公行述嘆曰恨來暮不見其人採其遺行其行述字字皆實也其歿而見慕於縣父母者猶如此冢子大川居公喪斷酒肉三年鄉試魁墨爲天下傳誦所著古文有卒田集鄉先輩如梁布衣質人李寓詹穆堂皆稱其得史歐家法次子大柄由郡武生例補國子生獨幹局修祠擴產於大小宗最有功三子大楫壬申郡揆貢四子大椿郡武生六青年喪偶守義不娶曰大柱七國學生暢孫邑庠生倏仍推社倉遺意今歲米斗錢二百有奇合出粟

千石爲米糶糶中有甚乏不能舉火者仍賑施之五子葵用俊秀監仕湖南沅州吏目號廉能家孫士偉中丙午副軍其餘諸孫入庠者七食餼者三孫曾中秀穎尤林立其一年甫十二即受知於督學林公哀然列諸生籍盛德之報善未艾云

賴五爲傳

張 達

賴公五爲名萬錦康之芙蓉都人建祚公之仲子也家世衣冠人文蔚起駸駸乎稱盛速明末兵燹蹂躪丁壯數百人脫險難者公之祖若父三兩人而已驚魂未定心目泫然夜夢神人告公父曰若將克昌厥後善自好無慮也既而生公少穎慧記誦不忘讀書輒曉大義狀貌魁梧磊磊有丈夫氣弱冠補博士弟子員聲稱藉藉公父竊幸夢之不虛見者因以知賴之將興基此矣會父母燕談笑曰某物產某處味佳甚公竊聽味來走度覓得之父母喜且訖則曰適有鬻於市者蓋親志所兆輒先其意以承之不徒斤斤服勞奉養之末也事長兄恭敬唯謹其待異母弟也情好無間弟鬻齡父卒公翼而長之教養婚配諸務一以身任迄於成立乃已自奉不期靡麗亦不喜問家人產有佃人某積欠數載弗償一日携囊至問所從來曰嫁女財也愆然謝弗受康邑中戶口殷繁甲於一邑者惟賴居最賴祠祭產頗豐綜理待其人僉推公董祠事羣情帖服其生平孝友仁讓足以取信於人大都類是居常雍雍大雅恂恂若不勝衣至於庭訓嚴肅雖禹鈞義方不是過焉



長子勛領壬子鄉薦次勛遊太學次勛勛俱邑郡庠猶不肯假以辭色其貽謀誠遠且大子若孫之奮翮南溟者夫豈有窮極哉乾隆六年康侯李公廉得公實躬禮其門舉膺賓筵余與公相知最真樂津津道之使多士有所矜式也於是乎書

何節婦郭氏傳

張 達

節婦郭孀人贈修職郎何應鑑妻也幼貞靜不苟言笑讀內則書輒曉大義父母愛憐之年二十歸鑑篝燈佐讀相敬如賓有藁卻缺風會鑑病孀人目不交睫目眦爲之裂鑑病劇願謂孀人曰吾與若且晚訣矣若有身男女莫可必難乎爲何氏婦矣孀人倚床哭曰君無以我爲念男女由天金石在我即不殉君誓不改志易節負君非我也鑑卒孀人年甫廿四越數月生一子呱呱藐孤一燈相對四壁淒然父母憐而諷之孀人抱孤泣曰吾聞婦人之義從一而終今幸有此一塊肉吾夫猶未亡也奈何以不入耳之言來相勸勉乎不顧而唾自是不歸窻者十餘年孀人家素封三世同居食不下百人錢幣出納無算孀人愛子教之以義方不令其過而問焉鑑性至孝依依孀幕巾裙願膾不假臧獲手鑑卒孀人善繼鑑志酒漿刀尺敬奉無違勞動不少惜姑媳相依有逾骨肉逮姑卒孀人慟曰姑與我相依爲命姑今卒吾亦不能獨生矣嘔血數升不數月亦卒得年四十有二子嘉深由國學生授縣丞職按例地贈孀人乾隆丁卯士民官司上其守節狀聞於朝得報

可給帑銀建坊論曰丈夫篤忠貞婦人守節孝皆天地之正氣存之爭光日月者也孀人柏舟自矢之死靡他卒克邀榮寵光泉壤孀人之獲報不爽矣然非守義自完孰與沐天朝之寵賚哉特緘陳之俟採風者得焉

學博盧澹齋傳

翰林蒞位 中年人

盧唐江先生自號澹齋康熙戊寅由南安府學生拔貢雍正辛亥爲吾邑儒學教諭邑左右皆山徑通桃源司茲土者外免車馬之供內鮮案牘之勞不無蒙職而安焉况學宮又閑散地哉自澹齋來條列學規引諸生與其諸子遊澹齋撥卷久刊布諸生習虛名人親炙益切於是多日至者或月至者則相與談經術評製藝文運駁駁益進矣每朔望集宜聖諭畢更示臥碑俾合庠人士身體而力行之往時邑多遁賦至是追呼之聲不登紳士之門督學使者姚校士饒郡廉得其概風以急公可嘉之額在任六年修廢舉墜泮壁一新橋門觀望者至今猶稱道不衰蘇湖教授分經學治事兩齋澹齋之館萬年也近之矣詢其配氏葉慧而賢先逝三十年斷絃不續其篤於情亦得乎性之正也子三十功士勳士勛分食南崇銀庠領孫九人鎮琮鎮珩鎮理已列聲序餘亦嶄然見頭角自乾隆六年澹齋已捐館舍吾邑人士思其教澤不忍以爲奉祀名宦吾又何能已於一言也澹齋諱大作字克振萬年稱爲唐江先生史官曰生人何必有喻行也觀澹齋儒篤於夫婦誼



敦於師生其處君臣父子兄弟間可類而推矣聞解組後南康士大夫從而矜式之鄉舉祭酒之好德謙不如我哉吾少攻舉子業讀坊間試牘愛虛名不恆不求何用不臧藝洗華存真淡而不厭見其文如見其人久矣及身與周旋而果驗也康人爲之歌鹿鳴吾仍爲之賦雄雉

林濃亭傳

石城趙丹 樞阜城人

公姓林氏諱必儀字湛持濃亭其別號也母氏凌太孀人夢明鏡自天飛入懷中而生公年十六爲諸生三載領於庠時草昧初開文風卑靡公獨潛心於東鄉文定待選一以古文大家爲準繩故公文超邁一時試輒高等康熙乙酉領鄉薦五試禮部不第癸亥亥謁選得直隸早城令公天性孝友事父母備極愛敬孀母蔡太孀人篤愛公踰於所生丙戌公赴會闈蔡太孀人疾亟彌留之際嘆曰吾有孝子何不及訣也六月公歸里撫棺辦踊死而復甦者再數載贈公歿哀痛迫切亦如之友愛諸弟篤於姜被然以家處素封外侮日至時那邑當道某方事貪酷有家者夜不帖席公剛柔合度雖遇危得免盜有竊其倉粟者公鳴於縣未刑訊而盜伏辜郡守以是發難一日之間府胥七至鈞攝公神色不變時三弟方患危症公朝下轅城購藥暮歸即與胥赴府大守故作威難公屹然剖訴守不能屈生平濟險應變坐鎮雅度類如此及其令阜城也矢志爲清白吏思貽父母令名

初祀事即減耗羨省催科自美儉約毫不擾民邑當孔道差絡繹日用車或數輛至數十輛舊例草料與半值僕夫苦不給公捐俸以補之請於上官許給全價至今民便之前分開奪訟獄滋豐縣胥需索未滿輒行竊勒公廉得其弊痛加繩束有犯許民上聞由是數年訟軼旬日剖決而訟以寢息一日坐堂上見門外有老嫗奔趨爲門者阻遂公怪問役以嫗患疝疾對公令攝嫗至前訴云某男在前令時爲捕役某酷誣坐賄盜賊銀若干公訊捕得誣振狀捕遂伏辜公初巡監見一老婦問所犯以毆斃少婦擬抵公曰衰老焉能殺少壯哉覆視案供詞鍛鍊遂詳上官得許檢驗果無傷蓋少婦素有疾疾會逢其適非以毆斃也老婦得釋政治之餘巡行郊外課農桑教孝弟其造士也則以躬行心得爲文章之本觀風所拔士飲食教誨期望有成在丹樞爲最造樞成進士而公已歸休三年矣去之日雲霧肅然百姓呼號雲集欲叩關留公公不許老幼錢行者以萬衆泣送十餘里乃已去後思公不置建坊顏曰民之父母公歸里後游林下讀書而外日與父老相慰勞當道貴人罕有視其面者至今鄉人士稱先達盛德必首公云

故守備盧魁文傳

宋 暉

盧公諱來非字魁文受官時更名文祥康邑唐江人也先世多以儒顯公父諱永襄公生二十八年突始發憤尋師受經併神緒釋卒稱學中翹楚以是督公兄弟學益力公曰方



今明政不綱盜起燔原彼一牧豎小人攻陷蕪都豺狼之輩一呼雲屯原野膏肉飲血結紳縶於敵朴者不可勝數此豈操毛雉時耶遂謝之以武勇聞欲爲世用迨我朝定鼎天下復見太平而山澤間土寇憑據爲亂尙未遑勦絕康邑地控閩廣嶺連岡蟻聚蜂起攻掠鄉落益泉棗莫可誰何會天子詔下郡縣令鄉村團爲義營自備其有能捕盜者別爲異等擢用公故敢於任事又積財能散往往急人之急傾囊以相存救里黨慕賴之者日久益衆至是羣推公爲營長公義不容辭乃單出其家資具版幹營築土圍以安老弱擇其壯者訓練之使環而守故一境獨清康熙十三年總鎮哲率師經過時賊衆數千人止掠河西諸村甚急公佻身往救擊殺數十人盡縛其餘以見總鎮總鎮壯之以授千總節帶征猶洞有功遂授守備節後四年將軍傳入廣討賊檄移總鎮選撥隨征官弁於是公將之柳州任以是役復備員而行慷慨前驅願盼自雄雖筋力不足滅也不圖熊虎喪律蜂蟻肆毒士多棄甲而公獨率所屬力戰遂不免焉嗚呼知則識時力堪集衆而能臨敵不避捐軀無恨如公者雖往古烈士何以加哉余來茲里見所謂土圍者爲詢諸生其故虛子鍾樞能言之樞公曾孫也因述其生平甚具且曰邑乘已誌之矣余以是悉公之行知公之志而又惜公之遇夫敵有堅脆地有遠近勝負之機非偏師裨將所能禦也向使公挾其所長得應推輪仗鉞之奇必不死即死矣歸櫬之日必疏爵以贈之書名於

史傳之無窮獨一邑之紀載耶然其貞壯之氣勇烈之概苟聞其風懦者立矣斯所謂死而不朽者歟故爲之傳以傳之

庠士王煦父子孝友傳

游紹安

論語有訓樂道人之善春秋之義善善欲長兇舉善以勸從政首務也余履任訪風俗敦意屬令有讀書敦本者以聞康尹孫君毅節舉數人貢生王聘以孝友稱略云聘爲故增生王煦子煦承父業節儉持家家計漸利積而能散倡修學宮纂刊族譜歲饋捐賑倡建社倉惟義是視其大者事親養志親歿廬墓三年友愛其弟歲貢生日澤其篤曰澤少敏嗜學厭俗琴胸身督煩瑣構軒種花竹廣貯圖書如弟意晦明風雨弟昆師友數十年無間易簪時猶諄諄囑聘曰我止生汝一人叔父三男所有家產惟叔父命無背吾志聘謹誌之事叔如父者七年叔亡指繁從兄弟始謀分爨室廬田畝與叔子四分均分合邑嘖嘖稱道穀躬禮其門焉用敢以告余雖聘克承先志推愛及從兄視煦之孔懷更爲僅見然非式穀局由似之邇者鄧令閣掛議謁別阜所修縣志請序並言曰邑王煦父子宗族稱孝鄉黨稱弟非一日矣蘭勿匆就道未遑述其行於誌願公表之余惟孝弟二字談何容易乃前後令相隔十年餘所云如一則王氏父子殆讀書敦本人也余方欲以其事上聞表章其人以風勸一郡而解組行急遂不果書此以俟後之君子



王崇範小傳

游紹安

記言人子於其先所恥者三曰誣曰不明曰不仁誣固非也若有善弗知知而弗傳直忝所生耳宜南康王孝廉永選於余之將行亟捧其父崇範墓誌銘求一言也按誌崇範本姓陽遠祖應祿繼舅氏因從王姓少出就外傳讀陟吧詩暢鳴咽不成聲痛七歲之失恃也祭墓必徒行四十餘里至老不懈一夕從墓所歸遇虎幾傷其童卒無恙人稱孝感家素貧舌耕南雄過農家夫出外婦餉翁趨避忍饑待其夫永選受邑侯申公聘主義塾禮待極學有以厚幣情其竿牘者崇範嚴誠拒之事繼母如所生待諸弟友愛無間推財讓產有古人風且一生敬以持己誠以接物無少長親疏均獎勸成就教子孫則以毋欺爲本故集名內省又名問心也鍾戶讀書所樂在是無意仕進不求名遂不彰舉鄉飲大賓終其身云觀崇範立身行己若此子竊慕其人恨未得見僅見於遺略予猶不忍湮沒况其子乎永選行擢甲登籍有孫宣邵宣部皆年少能文所以繼述其父祖者正未有艾也詩曰貽厥孫謀以燕翼子其斯之謂歟

王節婦記略

游紹安

南康縣節婦王氏者國學生王永元妻庠士王宣貴母也十八歲於歸二十三歲而寡孤甫二齡門無期功之親頗有遺產氏慮族姓覬利禍及孤兒遂一切出入不計羞首麻衣女紅自給不窺戶者十餘年宣貴漸成立入贅宮氏終未嘗言往事也雍正十三年氏六十有三矣其族鄰暨乃子之同岸友僉請循例請旌由學縣達府申司司以同姓婚姻詰查乃知王永元本宋陽玉嚴先生裔因祖應祿於明洪武十四年以甥繼舅故從王姓厥後歸宗與陽爭家產本宗爲改編王賢一戶自是墮王姓不得歸而王戶內本陽之子孫廟祀祭墓家譜仍陽氏祖宗兩姓嫁娶無避自明迄今幾四百年矣湖中復請主持者終以有干部議爲嫌事竟寢乾隆四年其孫王陽憲王陽運弱冠與府試余拔前列用入泮來謁以先請旌兩次皆由余牘淚陳祖母抱屈狀余甚憐之奈末由援舉氏於乾隆七年七十歲歿矣嗟乎少婦而寡雖生猶死氏不殉夫爲有子也乃事夫僅六年而撫子及孫幾五十載操既苦貞例復洽當顧以嫌疑不得邀褒典長淹泉壤乎天下之抱屈者獨是婦哉余不忍眞知見而弗彰也爰因康志重修記其略附梨版焉至王氏之孝順慈大節暨數十年艱苦狀親戚有傳家乘有載不叙諸孫王姓以陽命名殆追慨祖母蓋不忘所自乎

節婦吳氏傳

邑分鄧

蘭

我朝承平日久教澤宏深其所以風化人倫者甚至每歲旌獎節婦諸費數輒逾萬而閭閻之內益知砥礪凡少而寡處者大率以背夫爲可羞以不能撫育兒女爲愧辱憾恨然



而女德無極求其幽靜貞淑克全婦道者百無一二焉故矢志非難矢志而能盡婦道之爲難也余初集甯康邑志採訪節婦數十而得邑諸生商廷璉之妻考授州同職永宦之母吳氏者尤有可稱焉氏砥操數十年從無怨色以爲此吾分內事耳何足異所難者夫在而吾所以敬尊事長之道有未盡夫猶可爲我分其責夫歿而夫未盡之道並在於吾其責倍有難於他人者又念無父之子爲教更難於有父之子於是日夜勤劬上而承顏奉養問安侍病調護湯藥下而督課其子務使卓然有立教誨約束有加無已者蓋終身如一日焉而且坤性吝尚氏周濟貧乏歲無虛月月無虛日由其粗通經史略解大義有以使之然也嗚呼若氏者不亦可風也哉

王霖須傳

邑名

淳浙江

邑諸生王煦字霖須世居東蘇步坊高祖齋號雲盤以明經貢禮部授直隸蘇州府吳江縣主簿意頗鬱鬱旋托疾拂袖歸里杜門謝客日取漢唐魏名家詩暨古法帖展玩自怡意有所至或發爲五七詩歌以舒幽抑其後世有達人白鶴池故田氏園林時有白鶴棲鳴其間傳稱蘇文忠公南邊過此曾爲之賦詩也地土清淨氣象秀美煦居此數世矣連至煦復蒔花卉澗池沼植竹樹凡夫風雨之朝雪月之夕莫不可歌可詠無一點浮囂塵雜之氣隘人心目自郊至煦累世所積書冊史籍卷軸林立煦尤肆力其中每周覽古

史至孝子悌弟所爲真學婉曲之文與夫仁人義士所爲慷慨利濟之事輒欣然神往擊節三嘆賞之蓋天性獨至投之類己之物而適合也煦嗜好澹泊性情超遠能造於微作爲文章意有所至摭空而出瀟灑綿亘人但得其一片希微淡漠之機恍忽如見如霧夕芙蓉光豔隱現筆痕墨跡欲幾於化初族叔祖菊佳先生性吝宏豪邁不以俗情自羈長爲詩古文詞每酒酣後輿會軒舉擊節長吟甚至科頭箕踞白眼看人或爲詩歌序記好爲春秋臧否不肯少阿人意邁難之後終歲不出其白叙曰杜門謝客雖鄰密如林與遠谷深村無異見人面目惟恐避之不遠數年中情況殊惡時如傷弓鳥飛則急避時如枯魚作書教慎出入時如深山道士行出市上人與一鉢滿腹烟火氣經日始化時如老樹飽霜忽回寒裏之春風日過之而生光其青浪浩蕩獨標風概獨領新異如此及閱煦窗藝至目之爲寒山片石甚而明月三更深憶其文煦之爲煦可知也已其他物躬制行詳見前太守游公孝友記及人物誌煦子聘颯爽豪邁個儻不羈嘗以文章納款予於公餘之暇對之豁如知其來也有自因出菊佳先生文集數卷予反覆閱之放浪縱恣自異於人世置塵之外併待其所以與煦往來者聘又以其父煦所爲文章與其行義分晰具陳予是以知之悉而得之詳也是爲傳

朱節婦傳

葛

淳



太學生朱高蘭將以其祖母陳氏之節行求表彰於世先陳其本末於余俾傳悉而誌之按節婦君甫之女年十六歸加貴年二十九而加貴卒遺孤甫一歲節婦痛絕復甦者屢姑料其必以身殉因泣謂曰門戶單弱當思絕無可依賴者倘汝死吾且老不能撫此呱呱之孤奈何節婦泣然出涕曰爲此耳且有姑在夫未亡與共事之夫既亡惟未亡人獨任之吾誠欲一死順安所置堂上姑與懷中孤乎聞者嘆息鍵戶自守日見子而啼對姑而止藉績紡以佐朝夕饗殮入成爲節婦擢眉道孤既長受室生孫數十年苦雨淒風或有稍藉舍怡得安於心矣乃娛樂未幾而暮景又復堪憐孤受室數年而死念三弱媳七齡幼孫再世孤寡真大難爲節婦地也雖壽登八一而終然節之苦莫此甚矣嗚呼天之於節婦何其酷耶夫失所天而撫子喪其子而又撫孫撫子有腸欲斷撫孫無腸可斷天於節婦何其酷耶國家新例婦人守節查特者旌之夫奇特必以苦見今節婦莫踰其苦其爲奇特可知則得邀旌也必矣余方上其事於朝因詳其節概書之以告世之誕於文者

王節婦傳

葛淳

節婦王氏者國學生王永元妻也永元本宋陽玉嚴先生裔以甥繼男因亦王姓姓同而實異永元家素封氏十八歲于歸克盡婦道二十一歲生子宣貴越二年夫歿氏哀慟幾絕一切租稅出納俱置不問蓬首麻衣女工自給云抱心疾足不出內戶數年宣貴漸長

令就外傳早晚親課之勞勞孤寡吟誦之聲與機杼相和也又十數年宣貴成立補博士弟子員善理家計復得充裕氏志稍慰心疾亦愈更撫其孫年古稀而歿嗚呼未俗之儼鮮不重財利輕禮義問有能知禮義者亦孰肯棄財利卒之困財利而不能全其禮義者正復不少矣而氏獨擯棄所有甘心茹藥者數十載終教子以成名克復家業此其矢志何堅而識虛何遠大也則其所謂抱疾而不出內戶者其用意亦至深且苦也乾隆十四年余蒞茲邑廉得其苦節而與夫同姓雖邀旌典雖然格於例準於情苦節不可殞附入誌也可

賴節婦姚氏傳

葛淳

太學生賴恆堯少而醇謹不減古石氏諸子風時接之邑紳士中其容止溫恭語言率樸竊謂堪爲溫厚家子弟若弒式抑心儀其父兄之教先焉及詢之堯不幸而孤其父占魁蓋早年逝也以長以教成母力因述其母之節概俾得悉而探之占魁逝時家擁獲其多節婦隨遣之惟留一二老僕者於家侍諸孤終年不少假外出日就傳塾學夜則引之就篝燈自動紡績以佐讀讀稍涉倦輒易以書法習之其教之勿使諸孤荒於嬉而毀於隨類此至其事堂上姑則尤有足多者姑五十時積病踰六十醫屢易不效節婦憂危無計忽一日戾然曰醫不一手藥不一進倘爲庸手所誤奈何遂徵醫勿復以藥遣惟語姑食性



鷄所豚酒菜之具隨姑意所欣無缺以養之且姑意常有所欲周者因節省其家侈費蓄  
所有餘糧齋之輒無倦色如是者亦有年卽姑亦幾忘其病之何以已也而節婦則事之  
如故甚矣節婦之賢也爲之孤防微杜漸何習之能樂爲之姑體和志適何疾之不廖噫  
足以風矣余方事於志乘而讓所以新之於一邑振風扶教之學常恐不及訪焉詎節婦  
之勤懇懇懇於姑與孤之間者耳而目之而尚不表而出之設節婦姓姚氏鞏縣歲薦任  
廬陵學訓陞廣東瓊州總學正紹崇公之長女年十六適邑太學生賴占魁生三子伯即  
恆光仲恆蓮叔恆藩年三十而占魁亡其矢志冰操已歷年所邀旌蓋有待云

節母郭氏傳

唐廣陶

婦或以節傳或以烈傳周母郭氏兼之郭性慈柔而質樸歸周生仲庸甫三日擯去絳節  
曰吾安吾素耳生好讀書且慕不少輟郭鍼紉以伴時出其簪珥壯生應試行色病不廢  
業郭時其食飲羹餌者三年不解生二子長五歲次方醉病革持而泣語其兄冕曰此蕘  
諸孤惟兄是託吾於婦郭非不諒之有素其若年少何郭聞之引刀截腕血淋漓與淚交  
下嗟乎割鼻於梁有高截耳於廣陵有范不圖於蓉江而復有郭也烈哉及夫歿時年二  
十有八哭踊慘切而手加楚楚決意相從於九原諸婦以膝下二孤北堂垂白諭之郭權所  
重而節良自存手腕瘡於七年後猶然握髮不自如且抱且携且進養於姑皆一手之

烈家事付伯氏不問惟一婢相隨資其汲澆耳餘則其身勞無難色足不履外庭族有宴  
會概不與二子既婚伯氏僉勤清其資田使日理郭課督如初時出夫遺書示曰汝忘汝  
父之實志以逝乎故其子一珂一理競競樹立不墜家聲夫詩三百篇特載柏舟昭其節  
也顧之死靡他不聞共蹈白刃郭之截腕不愈難乎思凡古今節義皆一真性所爲當其  
發之最真幾不欲有其生雖傷肌膚不知其爲痛苦今郭氏所爲與曹令女截鼻割耳正  
異事而同性固非有所低昂彼此也余過雙江耳其節烈謂是風雷可感鬼神可泣將必  
有上其事於朝其膺旌典無疑也遂走筆而爲之傳

賴偉貞傳

陳之蘭

公諱建柏字偉貞郡廣生賴尙珠子也五歲而孤節母郭孀人撫之以長家素饒財之所  
在衆之所觀門內外貪夫逐逐睥睨寡母孤兒田宅是可取而代也四面皆敵使他人當  
此至則靡耳公才足馭變處多事如無事不動聲色而內憂靖外侮息既既性益豪邁不  
羈不屑與腐儒瑣瑣尋行數墨間往往遊於朱家郭解之徒義重於泰山利輕於鴻毛劉  
毅一擲百萬錢陳子昂碎千金之琴於市今日與公而三矣中歲大饑請於節母曰人  
皆饑而我獨飽兒食不能下咽母其哀多益寡乎母曰苟存心於愛物於人必有所濟是  
吾志也乃施粥數月所活幾數萬人又出粟三百石假貸鄉黨不取子錢或力不能償則



焚其券既償之粟仍給於戚友之貧者非是母不有是子非是子豈能彰是母哉迨服闋子道畢矣乃去走京華買舟下彭蠡周覽名山川古跡兩載而後歸歸則邑侯申毓來方修學宮崇聖祠尊經閣基隘無可措手謀於公公曰左邊地八九丈柏家物也願以助申公賢之乾隆四年邑侯李配仁復修學瀆河患水衝決公獨力捐銀七十餘兩乃築堤以捍之又七年邑建旭升書院修旭山關帝廟公以一百八十金肩往助之垂老更置祭田百畝以供祖祀生卒解衣推食急公仗義率多類此公年十七爲諸生明年領於庠久之以明經授永豐教諭辭不赴今年七十有四痛飲酒健飯如少年與之議論古今終日無倦色外史氏曰造物者以生物爲心然生之事半養之事半化工有所不逮立君以養人而後天地之德長人者以養人爲事然上之事半下之事半人自相爲養而後宇宙之治成若必繩以惠而不費是以王者之道責庶人也今或一父之子分財異居而後勢若途人或撫有餘或苦不足兄弟且不相恤况族人耶况邑人耶又况萍水相遭不知誰何之人耶利滅義而人道熄末俗頹風往往如此使天下每郡邑得豪邁如公者數十人體造物者生物之心佐長人者養人之事足以弼成王者之治矣抑聞公之幼也患血痢久不愈節母郭孀人憂之忽一日有道人摩其頂曰此子不凡雖疾且瘋無虞也勿藥有喜適有餽橘者婢以一二枚食之病稍減更食十數枚遂瘳意者豪傑之生天亦有以

默相之耶

郭遠亭傳

陳之蘭

公諱良梓字拂雲別號遠亭幼慧絕人敦尚行實義重如山利輕如羽其天性然也康熙甲寅乙卯間三藩叛羣寇乘間蜂起南康受害最酷丙辰朝命使者賑遺黎公時甫八歲輒往受粟歸以養父母年十二失怙痛父之早世也而事母心益迫矣左右就養能竭其力常齋錢穀往贈母黨以悅親心母歿行營葬地足跡遍廣嶺以北踰年得牛眠之所而後已蓋爲仁之本具是矣泊長博覽羣籍手自抄錄數百卷旁及醫卜形家無所不通餘力猶足以治其鄉政凡事之有關大義者爭之至數十百人千萬言不能決公出數語折之羣情胥服過物之哲固有以自見其氣也然少年豪於義而家中落壯益自奮五行百產之精力能取諸造物而有之纏萬貫者其腰擲千金者其膽營祖墓葺祖廟皆獨力爲之鄉黨婚喪力不能備物者往往有求於公隨其所需之多寡給之而去頻來類給無難色亦無德色郡修學宮以百金爲之倡邑建尊經閣出已山喬木數百株助之康熙丁酉邑侯李公遷堯闈於七星壩公一人始終經紀其事勞瘁無倦色用有不贈捐已私以益之父嘗施田六十石於東山寺使僧人歲一祭無主之鬼以靖厲氣其推廣仁術可謂無方豈非讀書見大義耶抑亦其孝於親之一念有以覃而暨之也生平智大於身而不求



聞達一邱一壑自謂過之每聞佳山水輒欣然一往以此終其身雍正四年以貢生應鄉飲賓自太守而下皆親造其門迄今子孫藩衍椒聊遠饒比於汾陽王公之德厚矣天之施報善人夫豈爽哉香園子曰古者百畝之田戶而有之椒粟如水火人盡好施也自授田法廢富一而貧百貧即救死不贖富者鑿於滿目顛連之狀而豫憂其貧勢不能不尚兄弟且不相恤况族人耶况鄰里耶又况郡邑耶子弟習見其父兄所爲且謂道固宜爾不復知天地間有良多益寡人相爲養之義忍薄成風其所由來者漸矣遠亭孝而能仁視黃金與土同價急公仗義惠及一方彼所謂豪傑之士也有心世道者急須扶起此一流人以矯頹俗

### 王覺堂傳

平江敦 琮 瑚

公諱永選字聘三號覺堂邑廩汝翼公孫鄉飲大賓馳贈修職郎文策公家子也世居城東粵繡坊公生而穎異經書過目成誦丁年補博學弟子員廿一饋食工制藝屢試輒冠軍肄業豫章三載與名師益友相劇切以故湛深經術發爲文章有唐宋八家風味自甲午至己酉五薦未售于子舉於鄉中壬戌明通進士辛未授九江德化學博蓋公之家自支祖御史啟賢公以來科甲蟬聯代有聞人至公而建樹益卓卓矣公性至孝事親色養幼隨汝翼公肄業粵之保昌聞父病徒步數百里省親文策公性畏藥公長跪榻前懇請

不已文策公感其誠一服而安公一生敬謹嘗笑不苟炎夏不袒襦烈風雷雨必整衣冠簪立雖午夜嚴寒酷暑不懈以敬親者敬天以愛親者愛體其大節有如此者待人溫厚和平見有寸長片善必獎借雖庸夫俗子未嘗忽視公善鼓鑄人材友教不倦自壯迄老授徒不下數百邑中領鄉會薦及知名者多出其門其官德化也年近古稀猶口不絕吟手不停披多士一經指畫卓有可觀尤以敦本明倫去僞存誠爲首務教洽六載士習文風蒸蒸日上丁丑年七十有二遂告歸去之日祖道寒途諸生舟送數十里嗚咽不忍別則公教澤入人之深爲何如哉獨以公之學識器量僅小試於鄉矜式於庠序未獲大展其用爲可惜耳其家嗣節亭由星子學博擢陞臨江教授與荆同寅者四稔臬吳相投誼同兄弟因得詳悉素履酒爲誌其梗概表公之文優德懋誠司鐸中之翹然傑出者

### 鄧節婦周氏傳

王 磐

南梁有處士鄧孔霄早卒其妻周氏一以理法自閑人無敢以非禮犯其姑姊過從每相謂曰輕枝弱草風霜小侮而輒變者生理曲也勁柏青松人對之而神起生理直也與我使屈曲而生而受人侮何如法松柏而生而令人不敢褻乎既而禮節聲聞內外皆曰某娣賢宜請旌乃復嚴顏以拒曰夫死不嫁婦人分固如是耳如是而遂以爲名乎痛抑之使人不置誓乃已至奉翁姑孝養備至尤屬意所生之父母予聞其事而嘆曰男女無辨



則亂升夫婦之道匪細故是故先王制婚姻之禮多爲之節以坊民然能明婦人之義者  
卒寥寥也嗚呼若婦人盡如氏者夫婦之道其不至於苦歟

賴炳川沛邨合傳

知府顧宗泰江蘇

公諱麟字見田號炳川世居江右之蓉城封君彥伯之家嗣也幼聰慧過人年方總角即  
失怙零丁無伯仲蕭慈幃訓養延師受業以家奴子伴讀有過失即撻家奴子與古人委  
曲成就之方隱合公讀書過目不忘日可數千言每背誦五經子史俱以全部師益奇之  
成童應試輒冠羣英騰聲藝苑甫弱冠卽應選拔赴鄉闈者再數奇不遇遂絕意進取植  
花卉搆一小齋朝夕與二三知己吟咏其中或時手談客去則朗誦素所習經史未常見  
手執書卷也乾隆己巳授瑞金縣教諭以躬行實踐教士不在尋常摘句問學中人咸親  
敬之時有武庠某與縣書搆登相角縣書不勝糾集差役佐門武庠亦邀同學相抵敵書  
役又不勝輒糾營汛趕毆學中文武士士人夥入學署書役營兵等叫號而散營縣尹捏  
報文武生劫庫城門書閉巡憲及總鎮俱至公出城遠謁備陳顛末且力保諸生無他巡  
鎮憲乃入城廉知其實益信公言不謬立斥縣尹後遂以他事掛彈章聞邑獲安士民德  
之爲設祿位牌於學公性倜儻遇難敢爲類如此居家孝與人信制事以義福福利害不  
避平生所有著述子爲人取去家無遺稿所存皆抄錄古人經史子集中格言數十卷年

五十有七卒於任所後嗣四伯與叔俱早逝仲繪着廩縣庠有聲其季諱澍蒼字雨蘇  
號沛邨賦性純粹恪遵先人彝訓讀書以明禮檢身爲重不徒事咕嗶乾隆戊寅補博士  
弟子員益專事經史不習舉子業未嘗應鄉試慕徐孺子之爲人每日赴試爲仕進地也  
人各有志簿書錢穀之任性所不適何如以詩書自娛乃舉通鑑綱目暨廿二史朝夕批  
誦事親色養司鐸公去世敬奉慈幃親甘旨節寒暄先意承志數十年如一日就先人所  
搆書齋訓子指示大義不在話訓誦讀之暇諸子侍側常稱鑑史事卓犖動聽聞者縱論  
明辨故諸子髫齡卽耳熟歷代興衰及忠臣義士立身立朝大節長覽諸史策若與素相  
識者遇不覺心意相投契也平生淡泊無所好縱家鮮宿眷不問生產處逆境不動其心  
曰世有更逆於我者若何取與廉待人遜讓無疾言遽色然義所當爲亦剛毅不苟徇守  
古人退一步法夷然常自得行年四十有五去世可謂善承先志者惜未及見後嗣之有  
成也炳川公如蒼松古柏勁節森然無一點脂韋態豪傑之士也沛邨公如幽蘭淡菊清  
香自愛無一毫塵俗氣隱逸之士也所謂後先繼美足以風世者泰粵東解組後主講維  
揚珠湖書院其賢裔相棟榭築高郵刺史時親款洽因得聞先世懿行乃知淵源有自其  
所貽謀者遠也爰爲表其一二以告後人俾知人在自立不以顯晦異裕後亦有方毋  
總于簞金之遺云



李錫允傳

江西趙大鯨仁和

公諱允錫字執中世居蓉城西外派祖純義官象山寧晉歙縣俱有政績曾祖永烈隸於郡生滿實滿貢生自華鄉飲賓有二子仲即公也公幼穎異左目重瞳讀書通曉大義以時公年十二耳忽一日心怖有驚顧難安狀屢促其母別遷母見公不能止遂從之是夕寇突至同若俱焚而公與母若兄以別遷獲免是其心怖早有相之者矣歸則頰垣裂瓦流矢在壁二人形影相弔無有過而閔焉者而公卒能以有立奮發有爲先其所重復嗣字修墳墓清田廬界畔膏對兄言經喪敗傾覆之餘復見太平不思恢宏而就佚豫其爲罔生特甚乃兄不與同志先世所遺用以快一時之意一掃而空公怡然不以介意獨立經營稍復故物仍以司馬君實之事兄者事之至其事母也誠心供養雖日用極爲拮据而甘旨無缺母亡殯殮盡禮絕不拘世俗所爲每朔望日必備酒食躬視奠墓下號哭不忍去者數十年如一日跡公孝友性其諸古江革薛包之流亞歎方公之避寇而歸也兩粵小醜未靖師旅征之往來如織芻菱供億唯按籍遞征度不能供者竟甘以絕戶告於縣以逃斯役公以零丁之身起而任之黽勉有無嘗捲其室中什物市銀將入官猾胥匿之公向督急索前銀反唾其面時雪深數尺坐逼公解衣稱貸而後已或勸公毋太自苦

勉教人所爲庶免是役公曰讓夷急病古誌之矣人所爲是以無後誣其先尙可忍乎卒貞其志而不移夫一事者全心之應也公以豪傑自命而天與人交抑之抑之者層累疊至而能抗而自樹斯固其力於承先啟後而舍命不渝者也然而心猶苦矣烈士暮年壯心不已公老而治家也內外斬斬不肅而莊諸子雖學成名立一言不中不稍假顏色至今禮樂詩書一門多賢者人爭羨焉而不知公之百挫不折於憂患中者思深慮遠有以使之然也公志於大義以自華已志後世之知不知非公意也然其人其行足以垂世立教余向欲表而出之余按試南郡一時所取冠郡邑庠者皆公之孫逢部曾孫曰份也後拔逢部貢成均因來京阜公狀故得悉公行而爲之傳焉

李處士傳

林枝春

李處士名上謙字六皆世居南康城西外父錫允母黃氏繼母鄧氏兄弟九人處士其仲也少好讀書不樂仕進以孝友聞於鄉康熙乙卯粵寇蜂起舉家避亂迴山岩次坪母黃氏卒處士年十二哀毀踰成人時五弟生甫數月每食先哺之父喜曰失乳兒乃賴汝而活耶丁亥處士七弟卒歲月錫允公及繼母鄧氏以幽憂並卒其後四弟三弟亦相繼卒處士終日號哭寢食俱廢或勸其節哀處士垂涕曰死生命也不幸父母昆弟皆棄我去得相從地下足矣忍獨存耶處士先世饒於財甲中之變邑人散匿山谷田盡爲勞豪



侵奪時錫允公方幼莫可誰何逮處士長佐父理家政經營生息用價贖回田數百畝析  
箸時錫允公欲多予之固辭終均其產於兄弟處士仁孝性成高祖墳鼎革後迷失幾數  
十年一日處士往田庄路旁有一古穴處士忽心動踰躅不前環視墓傍得一斷甃甃著  
蝕盡止露一李字默思曰得毋祖墳在此耶而又未敢輕啟歸語同族某則曰與我多金  
我即告爾祖墓處士許之因同至墓所撤開墓門甃甃果祖墳也處士父淺殯金盆嶺一  
夕夢父捫甃有憂色處士瞿然曰必蟻也因與兄弟謀遷葬啟塚視之果有蟻路如蚓幸  
未入棺傷骨改葬於蓮塘碧坑口乙山辛向其孝思感孚有如此者居恆訓諸子曰吾性  
不喜言人過昔馬援以書誡吾以身誡汝曹勉之又曰爲善當自近始家庭骨肉間過於  
厚僅免於薄耳有僑寓者負公錢穀甚多忽暮夜持金至曰吾負債多矣感公善姑償其  
半明日吾將逃遠方處士曰吾不望若償久矣曷持此金以償他人奈何逃遠方乎遂固  
却之一日歸自蠶憩路旁茶亭拾一小囊內有銀十餘兩處士守候不去須臾失金者跟  
踰而至泣訴曰此金盡蠶田以償官租者也處士慨然還之其人泥首謝去處士仁厚好  
義又如此雍正三年邑令金綬蒞廉處士高誼舉鄉飲酒禮聞者咸以爲無愧云年六十  
四卒子六人孫十餘人多雋才其叔嗣逢清余視學西江特薦優貢士也論曰士必立異  
以爲高矯情以干譽而于倫常或有缺陷又奚取焉觀於處士素行而仁孝誠敬之心可

油然而生矣善積於厥躬施及於後人宜哉

劉孺人節孝傳

傳書表曰 修新建

節孝劉孺人本邑劉載椿女及笄適賴君國箴甫十載而夫歿遺孤天寵時方五歲立節  
不他適康熙甲寅歲逆藩吳三桂煽禍江右所在盜寇竊發孺人毀而携孤間道走信豐  
之楠木峽閱月餘方至峽中有寨孺人父族緣亂先徙居於此因依焉孺人時爲寨中富  
家作女紅藉其貲以食孤不足則采野菜佐之二年餘盜寇方平歸邑城而居室費產器  
用一空矣時適有豪族見其邑潭口堡簞衣塘祖墳山水秀麗欲得之始挾以勞繼餌以  
千金孺人曰祖駭豈易銀物也家雖貧不爲此伊豈無祖願若此耶豪感之而事寢後爲  
孤擇配蔡氏見孤遊邑庠而殂此皆孺人曾孫吾友衍斯所述而予聞之數數者夫保孤  
於危難中而又不以貧故輕易先榮卓乎有守真賴氏功臣也迄今孺人所出後裔幾及  
百餘人中多衣冠之雋其留貽者長也論曰人生莫要於立節其中不無難易難易視乎  
時勢孺人矢志撫孤於夫歿更全孤於離亂盜賊兵火中可謂賢矣至却勢豪全祖塋甘  
以貧終尤足多焉然則世之偶際艱阻困頓連負君父重托趨利不顧所安者能無愧乎

王氏三世傳

傳書王際華

王氏世居城東蘇步坊以孝弟嫻睦著聞歷傳至明以從字吾好者同居數世男女內外



幾百人以從理家政倉然聽命不敢異言子弟中有異志者曲加訓誨或終不悛必置酒食會姻黨親族命衆切責之始鞭扑屏逐而後已自是型於觀感家人益凜肅詎許聲不敢聞每晨起集子弟省視長者外無長幼婦女必各授以職業嘗會食念及貧人辛苦每爲之嘆息歎嗚察子弟有悲憫惻怛之容則心喜不然悲賦之色終不解歲饑鄉里富人積粟者多閉糶以微厚利以從必抑價以出穀其貧不能支者周給之無少吝晚歲以未得知名自恨督課其子日夜無間

王家善字伯慶以從子至性過人穎敏嗜學幼習舉子業一燈熒熒自暮達曉勵志過銳疲弊皆忘未幾丁內外間哀毀泣血羸瘠衰憊日甚乃不勝喪越歲而遂卒遺孤一其妻袁茹苦丸熊撫之以至於有成焉

王崇瑚字璉也家善子少孤力承母志而性闊達豪邁時家人同居已五世矣食夥人繁而先世所部署家法不令少遺復構書室於別墅廣貯書籍延四方豪俊之士凡族中力學能文者皆使肄業其中其子弟學舉於鄉館於庠者甚衆鄉人彬彬稱盛焉暇日則灌花種竹飲客賦詩一時豪傑之士多爲之傾倒云

論曰昔張公藝九世同居自古稱盛焉吾觀江右則又有異焉者若金谿之象山陸氏則十世江州之陳氏亦十世至江州之旌門陳氏則十三世其間五世六世者甚多固其風

氣醇龐家尙敦睦有以使之然歟苟非代有名賢何能久而不衰也往予嘗嘆息此事以爲難歲庚午予奉命督學嶺南舟抵南康貢生王聘介侍讀徐君紹洵來適以五世同爨事聞徐君貢生姻戚也請予文其事予以爲人苟同居至五世無間其賢與德若何即其息紛競篤親愛已有可尙者况其間又不乏哲人如郡太守游君之所記葛縣尹之所傳者歟予故樂爲之傳其事於不朽焉

### 蔡董儒傳

### 蔡紹清

蔡恆純字董儒余族伯府學生世贊之孫族兄縣學陪貢生元煥之子生而體貌豐偉有幹濟才童試即警敏過人學爲制藝直欲造古大家堂與工字法一規先蔡年甫弱冠受知學使董拔置府庠歲科試輒前列因於棘闈康熙乙未就歲薦慨然曰吾老矣姑以此事付兒輩特於宅後建一樓藏卷籍見古書未有市者手自抄錄歲延名師與諸子孫講貫復嚴校課稍不如意聲色交厲曰若輩不思恢先人志耶董儒故老於文律衡論悉當往余爲諸生時每試卷必索閱閱畢評定或冠一軍或作第幾人無不中董儒天性純孝少失怙事母以孝聞母性嚴切董儒率教唯謹日有養必異膳不得其歡心不止先是厥考營葬沙溪費金索百母忽以夢告汝父屢爲我語幽宅不寧將若何董儒聞之淚下即與兄謀改葬或以前功頓棄爲惜董儒泣曰所得盡心於吾父者僅一抔土耳此而不用



吾財烏乎用吾財况顯不以夢乎否則感我母也既而母喪哀毀骨立生不雅尚義舉能爲人所不能爲暮年嘗自言曰吾幼時讀文正公義田記竊念宗族一體誼宜恤他日苟得志當做其規模次第而行之類齡漸迫力薄財寡雖欲勉力效其一二而卒未逮也迄今諸子多推財讓產不沒其親邑侯葛檢菴先生聞而義之與予各書其事於碑論曰士莫先於立本本莫大於孝弟能孝弟而五常百行一以貫之夫貴貴而薄於父母厚葬而累其兄弟慈子嗜利相習幾成風矣其他則又何說世如董儒者豈不卓卓乎哉

邵節婦高氏傳

漢上朱語

顯不貞則易熒力不定則易撼而才不瞻則不能以有濟求其不移其志以保其成而完其名於天下士蓋亦鮮矣况能得之一發榮緯整耶然則其志彌堅事且成而名亦以不虧是豈尋常巾幗婦哉邵母高孀人其庶幾矣當其及笄來歸文學邵君鳳池也琴瑟之好眉案之敬早噴閨里間曾不幾年而黃鶴之吟忽重陶娶悲矣孀人時年甫二十有二所遺藐孤今郡庠林秀者誕纔數歲室中與相晨夕備然僅一姑耳節婦出奉桑榆垂盡之老嫗入抱一線僅存之孤兒凌風冷月朝括夕捃絕不以稍易其始志迨姑歿斥上諸務悉力經營今且年五十餘矣家業益起抱孫弄膝下而向所稱藐諸孤者已巖然頭角噪聲膠庠佇看策名櫛績上花譜於其母也如孀人者豈多得哉他日垂之形管共姜而

外酌謙誦人出一頭地矣余且用爲天下後世尋常巾幗中婦婦者勸也是爲傳

蔡上賓傳

李逢清

蔡明選字上賓世居蓉城東內四方園父子謙庸熙丁亥年歲薦有四子明選其長也選幼讀書穎悟過人年十六爲郡諸生二十督學使者查而領之文學益著性孝友精敏義所是許非有所爲而爲常夜讀不輟且晝佐父理家政故于謙公日享其逸得雅歌投壺自適也歲丙戌于謙公因率族衆修先世祖墳被誣爲毀祖告於府誣者匿名時長官風烈府督至族人怯欲逃于謙公亦怯選慨然以身代借族人往及庭鞠時刑具森列度不能免選反覆上其確實誣乃雪長官色始霽惟覓誣者坐之是不惟趨父之急能使父不受誣也父所蓄志未逮者欲諸子孫數世同居之宅以勞不能支每起念輒止選毅然引爲己任宏其規模經畫區處得父意庀材鳩工日不暇給者近十稔父憫其瘁間命諸弟佐之選意殊不憚督其塾學卒業以故叔弟明達季弟夢龍得登志功名迨廣夏落成先後俱領鄉薦其仲弟明通之嗣早逝婦王氏守志屢請以選之子爲其夫後選使人諭之曰汝汝夫吾子固當使吾子後汝夫受產非所以己爭不如立兩叔子且兩吾子爲吾所立吾子其無辭乎爭可已而汝乃得安婦泣受命得所特以守至其邀旌典也人咸謂感選之讓愈有以堅其節云乾隆甲寅十一月二十九日年四十九卒明年屆歲薦之期人



重以此爲惜不知以選之才之學僅優一歲庶乎哉即不及歲應何惜也子二伯新柏仲  
新楷俱學成名立有父風論曰士苟經變成宜而所行合義其至性必有以過人者選亦  
惟是固結於中有不可解故倫常之地無所於苟若此傳曰不爲威惕不爲利疚見於近  
可謂至性矣

郭節婦王氏傳

李逢部

節婦王氏邑諸生永韜女年二十適同邑諸生郭銓生一子年三十二而銓亡節婦一恫  
而絕絕復甦復恫者屢矣歲餘子亡節婦誓欲殉夫姑泣諭曰叔已生子俟再生即爲  
汝夫立後是而夫無子而有子也節婦勉受姑命扃戶自守惟勤十指以奉姑里中雖比  
屋婦孺罕識其面蓋將有待以繼夫也終叔之世不再生男而姑亦死未幾叔子又死夜  
雨孤燈蟲聲唧唧此婺婦斷腸時也眼流血者數月遂誓或勸之就醫節婦泣然曰醫欲  
不替吾耶吾誠不欲醫不醫爲有見向日見姑今欲見誰耶吾所以不死者叔子遺兩孤  
一數歲一數月竄撫數月孤爲吾夫後且以畢姑命也乃撫之數年而孤又死孤死之五  
日而節婦死死年六十有四於戲節婦甯遠死者乎然欲不遠死得乎夫亡子喪以姑命  
不死姑叔三世繼逝以有兩孤不死迨所撫孤死節婦安得而不死也然如節婦者可以  
死矣國家律令婦人未三十守節始得邀旌典今節婦已逾二在故守節而不得旌說者

謂爲節之不幸使必欲爲其節之幸是懷名心而利於速死其夫也詎節婦心哉然節婦  
之苦若此觀他婦爲甚而又不不得旌其宜表著之以風勵天下視他節婦爲尤亟節婦族  
子王聘嘗趣余爲作傳余與節婦居最近悉其事最實故得次其梗概以備史氏採擇焉

盧貞婦傳

知縣李夢聰

貞婦黃氏龍南縣諸生文龍之女幼字南康盧鎮溶俗有不道吉而歸夫家者謂之養媳  
貞婦以童年養於盧未結褵而夫死貞婦時十四齡耳矢志貞守依其姑以女紅奉養迨  
後姑亡夫有兄亦歿與伯叔共朝夕貧幾難以存活族人有用之者義不受盧姓聚族而  
居在上猶之下游地名唐江歲甲申上猶縣山水漲發建瓴而下漫衍冲激唐江濱大河  
居民咸遭水貞婦室廬亦浸毀貧益甚族人復有周之者貞婦曰我年已逾四十受之可  
無嫌也貞婦可謂知禮矣夫自十四齡至四十餘歲而後族屬之周之者自許爲可以受  
其別嫌明微堅於自守篤於自信即讀書明理之士夫不是過也而出於單門貧弱豈不  
難能而可貴哉今與叔共繼一子尙未能有立而貞婦飲冰茹蘗數十年來如一日也盧  
生鎮珪爲余壬午分校所取士於貞婦之夫爲三從兄弟以貞婦事告余將求所以表揚  
之者余旣爲之傳係之以贊曰貞婦未成婦也未成婦而婦之成其志也謂之婦則故有  
夫矣故守也未成婦而以婦守故曰貞也令甲守必計年今三十餘年矣是真能守者也



三光五嶽英靈之氣皆正氣也而鍾於一女子墮落茅華中有凜凜然者說者曰貞正而固也嗚呼其是之謂也歟

謝模齋傳

侍郎翁方綱大興

江西南安之郡南康有篤行君子曰謝去浮先生余以乾隆己卯與江西試先生之子啟昆舉於鄉其明年啟昆中會試時江西所舉士咸萃京師則已聞先生樸學力行溢於人口矣後四年余視學廣東舟過南康先生訪余舟中道氣粹然語皆醇實益嘆人言之有自也先生諱恩薦少爲諸生則爲羅文止之文超出時輩及課諸子皆成立益以砥礪躬行爲實務啟昆守揚州天下繁華地也先生教以崇儉厚風俗有戚族欲爲先生稱觴者適貴州某令運銅過揚州舟覆逾期不能進先生語啟昆罷讌會之費以拯之啟昆前後知鎮江甯國府一秉家誠爲之皆此類也性篤孝友先世所遺產皆積以贍宗族而平生無兼味無華服姻戚宗族有貧不能婚者爲之娶死無所歸者爲之殮有與一區與人僦居焉輒貸其租里門出入不乘肩輿於邑中公事無少諉避而不尸其力嘗終日燕坐無跛倚與人言無疾聲連色平生無嗜欲翫好其恬淡蓋深於性也方綱不輕爲人作傳聞先生學行久矣亦不因其子之克家而始爲之傳也配王氏以孝慈勤儉稱啟昆守甯國聞母訃郡人泣奠者數千人其內行可書者不盡縷書也子男三啟晟郡廩生啟昆官

翰林院編修光日講起居注官今爲江南河庫道啟島廩貢生先生以啟昆貴贈朝議大夫配王氏封恭人

明世杼傳

教諭程元起

孝子明其姓應臧其名一字世杼世居南義三圖之西木村秉性純篤讀書通曉大義平居以孝友聞於鄉幼年失怙奉母三十餘年常得高堂歡內外無間言庚戌母歿哀痛徹骨涕泣幾不欲生喪葬如禮來觀者咸感泣孝子撫然曰生我父鞠我母三年而後免於懷忍繼母骨空埋泉壤耶爰築廬墓側齊衰草履朝夕奉香楮跪供飯追母音容弗克見鼻涕輒涔涔下夜深風雨雷電交作螿蛇鸞獸之聲不絕於耳孝子心弗動怪亦弗敢近人皆以爲孝徵所致如是者三年衣敝履穿面深黑如漆哀毀骨立形貌羸然削族人往勸之歸孝子叩頭大哭呼天搶地一慟幾絕於是族衆強昇之歸里歸之日觀者塞途莫不嘖嘖然羨僉謂孝子之行難且苦其愚爲不可及也已夫士人不矜小節立志顯揚馳驅道里妄希博高官厚祿以享親一切服勞奉養略焉弗講致使年老雙親倚閭悵望此情此景舉念何堪甚至科名潦倒中途相繼徒使抱恨中天生無以盡其養死無以含其殮毫無以臨其穴若斯人者聞孝子廬墓之風亦可以少愧矣孝子家居謹樸廬墓後足不踰外戶面容常有憂色依依孺慕數十年如一日族人懷之以其孝行請於官經明



府黃給匾孝稱宗族又請於府憲胡給匾足堪矜式又請於巡憲雷給匾堪爲堪式旋經儒學詳請督學部院汪給匾敦行孝義我同事西齋吳給匾孝孚閭里鄉里咸以爲無愧云

### 李宣仕傳

翰林院侍講學士 法式善

覃恩修職郎宣仕諱盛祿江西南康縣人名宦李公謂之裔孫也性醇篤事母至孝母病日侍湯藥衣不解帶者匝月禱於神乞以身代家故貧販魚爲業人以其無欺也交易者蜂擁焉家漸饒肉帛娛親日啖粗糲多衣舊絮著草履未敢以溫飽自恃貿易之暇過僧寺談藝稍親筆墨能解大意章句之士咸欽其理足常架屋不誡時日與工定向與協紀辨方所載脗合善風水輩驚爲神歲旱澇粟貴借素封家給米周饑道路之崎嶇橋梁之傾圮捐貲修茸樂輸者聽焉亦善與人同意也宗族戚友中不能葬不能讀不能婚嫁者爲成全之有無賴子欲禍之昇丐人屍赴其門爲索詐計午夜至前則見持燈者於其門外絮談不休乃驚退復往如故天將曉棄屍路旁次日鳴官得其實置於法後有賈貨者翁以誠相待皆不能逞其奸其有神助可知由是爲善日勸丹旆府學勸聖神祠至數千金鄉里推重豆區詄諄翁至一言帖服昔謝靈山中丞居家時見之稱爲樸直諸當路以急公好義克敦六行等匾獎之邑宰徐詳請題旌獎好善樂施給以坊表年近百歲如

童子顏健步若飛中年者雖疾行亦不能前後無疾而終識者以爲爲善之報也至其子若孫能繼先人志好善不倦遊庠序數人將有大成者盧蔗香明府爲余言余欣然傳其事以風世並題詩於其行狀後云

### 鄧節婦馮氏傳

邑宰徐景

節婦氏馮早四鬮處士鄧芳樞繼妻那增生琦繼母那附生濂繼祖母也淑德無瑕貞心不二固有可法而可傳者年方十六歸于輝廿四歲而輝卽逝其時腸斷心傷欲相從者數次烟黛慰曰若欲死從一固義也顧堂上老翁孀姑膝下稚兒幼女安所恃以仰事俯畜乎孺人始含淚節哀治夫殯事後惟以養親撫孤勤女紅佐課讀爲務言笑不苟足跡從不出閫外孺人已生一子一女前室一子一女已子未週而歿撫前室子如己出子已生孫均令就學子亦恪遵母教誦讀行善事兼取詩古入郡庠旋補增生孫名濂應余縣試余每器重之亦補府學弟子員曾孫皆應童試其事上勸節教子非實有可法而可傳者乎今子不敢忘母之教沒母之節嘉慶十一年呈學申詳奉旨旌表十四年余欽承簡命筮仕南康至十五年其子具稟領給建坊帑銀念此極爲盛舉一會其面見夫溫文儒雅誠懇敦龐有醇古風詳陳顛末始悉爲孺人前室子因爲之語曰世有前室子與繼母不治者屢矣今子更爲繼母報節其能孝養可知况已經數十年乎是母真不愧爲節母



卽子亦不愧爲孝子也斯世尙有若人不可爲世道人心幸乎後因公事而詢及之所聞悉如所見廿二年春令子具事實世系懇余作儒人傳以光家乘維儒人一生苦節始終無愧果堪嘉尙跡其上事老翁庶姑皆臻耄耋墳塋以禮可謂孝矣廿四婦居七一金操可對夫子於地下貞同金石矣令子若孫克副繼承先志之望可謂澤及後人矣語曰積善之家必有余慶其後代之繁衍榮昌可預爲儒人卜之是眞有可法而可傳者守土者竊幸有光也公餘遂樂而爲之傳

鄧映虹傳

訓導劉 敏

鄧夢勳字映虹世居北鄉高塘村幼穎敏所讀書歷久不忘且通大義未冠爲文卽理明詞達每府縣試卓卓有聲奈數奇督學使者試輒報罷公益勵志芸窗所受業師率知名士後應試以額滿見遺者數次復因高堂早逝家政紛紜而功名之念遂稍稍淡矣乃援例由上舍生入貢晚年復授州同職此公之厄於遇者如此然其生平所肆力究不在此夫人於祖宗室廬邱墓之墟祠堂祭祀之典修廢舉墜以及鄉里族戚死喪緩急之事籌畫經營傾囊推解以期有濟者皆事之至雖人情所不能爲亦人情所不肯爲公之里居聚族百餘載丁口繁盛地脈剝蝕居多而開塞經途培土蓄蔭已獨力任之族之大小祠不一曰五大曰德政歲久傾圮俱爲倡修整齊又貴寵堂置產積貯備祭更於寒坑地捐

買租田一百五十石膳通族爲義倉當青黃不接時擇貧乏者分別與之至今歲以爲常其經理橋梁創之修之凡六七座道路伐石平治者五千餘丈所允難及者每款歲里中乏食者出粟米貸之不取息其不入母者聽之又或減價三之一或半之糶至新登乃已約計橋路粟米等費不下數千金又此外貧老病苦歲給衣米藥物不能舉者與以棺以及往來通衢設立茶竈其解私囊以共濟者又如此以是鄉里戚族無親疎遠近咸嘖嘖稱之云年八十四卒例贈儒林郎卒時猶以生平美譽囑孫家浩恪遵毋違是公雖弗得志於生前其亦可無愧於身後矣世能如公者豈不卓卓乎哉

劉元綱廬墓行狀

劉 敏

懿夫賦氣成形人得五行之秀屬毛離裏孝爲百行之原此人生之地義天經而先王之至德要道誰無父母咸知罔極深恩念此劬勞徒抱終天別恨是以百年白首子職且愧於生前况乎一片青山親恩孰隆於死後儒童劉元綱賦性純誠稟資樸實未離襁褓在母不憂及至垂髫與衆無忤曾因母病恆繞榻以悲啼既就師實不釋手而嬉戲舞勺而後文理粗通成章以來天性彌摯歲已巳而年方十七琴瑟初調越庚午而歲值龍蛇蒿莠拖痛遂呼天而踴地哭繞尸牀及蓋棺而唯堂身依靈座且寢苦而枕塊亦垢面而蓬頭哭泣不絕於聲水漿不入於口家人以節哀相勸始食稀糜踰月而祖饌於庭扶歸夜



室靈其渺渺家人泣血以言旋孺慕依依是子哀鳴而不返拜辭族黨泣別親朋不怯風霜遠黃腸而露處但憑土石抱竹杖以孤眠室纔一間方可七尺芟茅貼地鋪成六尺之牀掘土成窩圍爲三足之窻汲溪泉於山下拾落葉於林間惟願與米聊充飢餓之需探藏爲蔬不近腥膻之物盥手不噴面墨色塵汚和淚以抒辭哀鳴血濺長垂數尺髮內冉以秋蓬繼三升麥窻窻而塗炭予也來當辛未即耳熟乎其人迄至壬申遂身親乎其地目既得而見之心實爲之惘然亦越明季之冬爰閱三霜之服是子習焉成性若將終身家人恐其傷生勸之終制乃匍匐而歸里遂勉強以奪情且夫喪服居廬人子祇行於哀次而臺場築至先王不著於禮經誠以人情之所難不以相強豈謂庸行之太過未足稱賢是以虎以鹿遺漢傳歐寶昂與粟賜宋有毛洵益木天性之誠至毀身而不惜况在弱冠之歲尤血性之獨真於是鄉黨攸好宗族同稱謂學校以明人倫晉籓子而來告也而文輒適臨南郡遂據實以書升之荷蒙褒嘉兼賜匾額此其至誠之性非以沽名然而不置之思尤堪勵俗倘其詩書得路將積學以揚華庶幾圭璧其躬更敦行而不忘朝廷旌揚有與他年應表門閭鄉黨衰同榮珥筆還垂志乘

何慕韓傳

公諱琦字楚三號慕韓世居龍華江封君永貞公之次子也兄弟三人公天性孝友嗜讀

訓導黃淳



書年十二失怙弟瑛時年九歲友愛甚篤事慈幃色養匪懈弱冠補博士弟子員雍正壬子舉孝廉維時弟瑛亦因受兄教督入膠庠朝夕惟奉甘旨承歡膝下不敢請咨赴選如是者三十餘載俟母棄世始赴京侯餘任直隸縣尹廉以持己慈以撫衆攝篆定州牧州城崩塌捐俸修葺以衛民北地蝗蟲損稼甚親率民驅除初生如蟻則掘其浮土漸長如蟋蟀則鞭逐築埋於坎及其生翅能飛則夜設火坑用竹稍趕而焚之井井有法蝗不爲災凡有關於民生利害者皆盡心竭力以興除焉上游器重臬臬薦擢因年老解組歸里荷風兩袖士民咸歌頌之家居十五載閉門謝客義方訓子埒里欽其德望舉鄉飲正賓後嗣五列成均者三次子藥食饋邑庠五子明經奎尤好學輯麟經五傳摘錄其要自成一家言敦篤苦行修祖祠則經理完善施龍華江橋以濟行人孫毓金饋邑庠餘亦蔚然見頭角皆公積厚之流光也淳忝司鐸於康因得聞公素履其後裔敏請爲之傳以垂家乘乃略誌其梗概以俟闡幽光者採擇焉

謝中丞蘊山傳

進士賴相棟邑人

謝中丞公諱啟昆字良璧號蘊山諳增資政大夫去浮公之次嗣也姿性穎異讀書輒數行下長習舉子業一以清真雅正爲宗年十五入膠庠邑宰葛公懷古深器重之以經史古文詞相質難於是業益進年廿三領鄉薦聯捷第八名進士辛巳殿試二甲朝考欽取



第一引見授翰林院庶吉士分習圖書丙戌散館考列第二授編修充國史館纂修兼協修記注官戊子廷試充本衙門撰文庚寅主考河南鄉試辛卯分校禮闈兩拔擢稱得土京察列一等記名以府道用尋充教習庶吉士日講起居注官壬辰奉命授鎮江知府京口旗民雜處公結以恩信與鎮將相得二年無兵民爭鬥之事治獄遇關倫紀推鞠務得其平郡有寶晉書院廩餼每不給乃以江心突漲蘆州二千餘畝益膏火以故士風日盛調守揚州執法平允不以州牧怒入人罪不以積猾越控陷縣尹逾年大旱親勸災最重者多列極貧上官有難色曰赤子帖危而不救非所以宣皇仁重民命也得發粟十餘萬米數萬斛率屬散給八邑民全活無算時以詩案辦理遲延被劾赴京直陳得蒙昭雪返揚州值南巡盛典制撫軍奏留江辦差蒙召見賜宴賞貂皮墨刻等物奉命督甯國府知府赴任道出常州宣令具舟迎堅却不受禁絕苞苴嚴查虧欠而侵漁掩飾之弊遂革屬縣家奴有不法訪實置諸法台境肅然嗣丁艱歸里服闋引見仍發往江南以知府用未補官奉特旨陞授江西南河庫道兼轄蕙蕩營向以葦柴供著薪力禁之人不敢干以私積三年除左右蓮正額外補舊欠至數十萬陞浙江按察使寬嚴相濟著藩司革殷富爲糧長弊民免波崇陞山西布政使晉省倉庫多虧欠缺嚴加清釐革除陋規糜費一年中彌補金穀盈餘貧民無騰徇曰非苛刻也水懦火烈勢宜然耳旋調浙藩勸各屬風

災隨從六七人所過無不億費杭城居民稠密多火災爲置救火具又定折斷火路公捐建屋之法嘉興有阻蕪風大爲民害出示嚴禁刊入府縣志做俗以革三年任滿陞廣西巡撫適浙省報秋收陷子奉到硃批浙省九分收成士民安樂皆卿等公忠所致抵粵後若不移此志益勵忠清蔣見福澤繇繇如川之方至矣勉之欽此尋奉諭奏補虧空之法意數千言其要仍責成大吏革陋規以清其源倡節儉以絕其流廣求愛民之術以培元氣獎廉正之吏以勵官常奏入稱旨粵西與安南接壤民豨雜處特以鎮靜加以撫綏值安南與農耐擄兵附近內地亦與阮藩相侵奪乃督率僚屬守關隘禁通逃使之畏威懷德邊民安堵時土司多貧乏奸民以重利制算乃黜奢崇儉察奸民安良善始得休養生息爲粵西藩籬灘江爲楚粵黔滇之要津多淺阻且堤潰灌入民田河遂涸乃率吏修築做浙江海塘法用竹篾囊石固隄田獲全者數萬畝而中流無壅滯之患商民感其惠名曰謝公隄修修省志舉廣西邊防形勢土司沿革與吏治相輔者搜羅成書悉摺進呈奉硃批有益於民之事儘力辦去必邀厚福嘉慰覽之欽此監臨鄉試嚴立關防內外肅然無敢以私營者留心營伍庚申夏調兵赴楚威奮勇出力得邀恩議叙由平素勤訓練精選擇故也政事本末類如此性孝友迎養者再省親者一伯仲怡怡睦宗族立祠膳田致祭親戚有貧乏者常加周恤居官不妄取愛儉約以宴會多奢麗作五簋約爲吏屬先



小心慎密好學不倦尤工詩有樹經堂集若干卷又常組織史事參以論斷作詠史三百首所著有西魏書小學經義考史藉考廣西金石錄勝朝節節諸臣錄延名師訓諸子公事不使與聞以故簪纓世繼家嗣學增以廕生授部主事次學崇禎冠入翰林守河南開封旋視察開歸陳許三學垌以比部郎守粵東潮州陞授豫省糧道咸格遵家訓居官有法度四學培例授分府猶奮志赴鄉闈孫振晉山西汾州別駕亦慎守官箴晉教澤之所留遺也嘉慶壬戌歲公年六十有六卒於任欽賜帑銀三千兩歸葬准入城治喪命江西撫臣代祭錫以上諭曰鞠躬盡瘁臣子之芳踪賜恤報勤國家之盛典爾故昆性行純良才能稱職方冀遐齡忽聞長逝朕用悼焉特頒祭典以慰幽魂嗚呼龍錫重壚庶沐匪躬之報名垂信史事昭不朽之榮爾如有知尙克享欽此棟明居學末幸瞻光霽因修乘志得全觀德行宦蹟景仰不已爰爲摘其大略垂諸簡編極知蠶測未盡汪洋然後之人知前哲之政事文章當有勃然奮興者於士林不無一助焉

謝門王氏節婦傳

賴相棟

貞節謝門王氏馳贈文林郎王公遜安之孫女國學生王公魏柱之女也幼字同邑謝學芳乾隆甲申冬于歸芳家貧游藝乃棄舉子業習技命卜戊戌夏出遊粵東氏年方廿二越歲勇卒殯後姑隨長子遷居崇邑氏無依父母曾之輿歸家養更數載夫終不歸其姑

謂之曰汝夫良遊幾年毫無音耗存亡可知累汝苦守吾欲將汝再醮無負汝青年也氏聞言痛哭誓不再嫁歲辛卯風聞夫在南雄急欲尋覓適氏胞弟隨父往江南建德因與同居族弟元章往探刊招帖沿途細訪由小梅嶺至上索墟詢該處關帝廟業推卜者咸言數年前有一少年來推卜姓氏相同因生意淡薄日給難度已死於溝壑矣元章猶不遽信續往保昌始則遍訪絕無蹤跡仲冬歸以實告氏呼槍掛蹄啼泣不已母爲隄防果乘間自縊呼救得免母慰之曰汝夫存亡未定遽爾輕生設遠遊脫歸不愈增悲慟乎氏遵母命忍泣吞聲其心則不可轉也自是衣裳縞素明知夫已不存特未敢遽然成服貧乏難以度日勤十指佐母家度活如是者數十年年七十有六而終噫貞操若此斯乃謂之節矣夫節守於溫厚之家易守於寒素之家難守於有繼嗣者易守於無依歸者難且守於才名出眾者猶易守於庸碌無奇者爲更難夫家無所出傍母族以終身可謂貧無依矣因貧而出遊因遊而賣卜未見有傑出之才矣卒能空閨茹苦死靡他豈有所爲而爲哉無非從一而終不肯以一身事二夫也充斯道也天下無不可事之君無不可事之親長盡其在我命付諸天詎必輔聖主而後忠侍慈父而後孝接賢昆季而後克敦友恭哉此不惟夫婦之道正推之人綱人紀隨在皆可自盡是有裨於名教也因夫存歿未真不獲仰邀旌典願一生苦節若此可令泯滅不傳乎表而彰之於乘以爲風化勸



張鍾氏姑媳守節記

翰林張舒翰水新

嘗思人生之大義莫大於忠孝廉節尤莫難於忠孝廉節忠孝廉節固難而惟節則尤難况姑媳俱寡家值貧乏且無似續而矢志柏舟不尤世所罕觀者耶如同宗鍾儒人係猶邑秀士鍾嘉言公之女康邑儒童洛芬兄之妻也年十九歸于芬幸生一女二男長桂釗次桂錦不數年而所天遽隕孺人哭泣之哀每欲相隨地下家人咸相勸慰曰女幼子孤爾毋過痛尚有故友僅六齡長子甫三歲次子方襁褓將何人拊畜顧復乎由是孺人勤稍釋死而復甦者數次嗣是孺人足不出戶庭上奉高堂朝夕罔懈下撫兒女教養兼周迨女年及笄適于贛邑會胸公之長子優增生聞檢爲妻妾長媳係本邑任直隸定州同知何琦公之孫女次媳係本里候選縣貳尹陳公德芳之妹其嫁女之粧奩珠采荊釵裙布二子之教養婚配悉孺人之克儉克勤籌畫周章而躋壽盡善也孰意長子釗僅生一女青年早喪次子生而不育相繼而亡惟姑與媳兢兢孺子立形影相弔其零丁孤苦奚若也維時有勸二媳改適者曰爾二人年俱廿餘膝下無兒重以家無餘蓄何不早作他適計乎二媳自矢曰妯娌二人家雖貧實無兒可依惟有奉侍左右終養告姑婦縱欲糗茹草無憾也誓不他適鍾孺人爰爲二媳各撰孫以承宗祧迨姑年六十承姻族早報節孝疊蒙各憲詳報旌獎候于咸豐辛亥年享壽七十壽終內寢矣不意長媳所撫之子焜份年甫

十九雖已婚配無嗣早天次媳所撫之子焜倍幸生二孫二媳遭家不造備歷艱辛家業蕭條堅操不易處者長媳年已六十五次媳年亦六十三矣其共勵貞操節凜冰霜孺守清閨言笑不苟謂非孺人之教訓有素姑克謹於前而媳復謹於後慎始慎終以續承先志永矢弗設者乎余因族誼固素稔孺人姑媳之苦節堅操實非易觀各歲修府乘業已登諸棗梨茲值縣志重修復爲闡微顯幽以垂諸不朽云爾

雙烈婦傳

沈恩華

雙烈婦者儒童張昌信妻黃氏及其從子承緒妻林氏也黃氏自幼識大義父倉遠悅昌信才而奇之女相夫子離離肅肅得堂上歡歲內成舅姑相繼亡昌信驚哀痛咯血疾殆黃剪髮和藥嚮指所天日憂夫之疾而不忍以忘親者勸夫之少痛也昌信卒家人慮有變日夕防護之願自屬續以迄送塋若無異他婦之喪其夫者防稍懈卒自經死即昌信窆旁之日也越三十餘年而有林氏之變林氏歸承緒習聞黃之烈歎嗚悲悼之清河故儒素家承緒父讜以名孝廉司鐸吉水有聲林氏隨承緒侍庭帷幄甘旨撫子侄寓慈以嚴承緒體素弱援例納一官未赴選林憐夫廬亦不願其跋涉四方也無何承緒竟以癆瘵卒林哭之慟誓以身殉不得間昏暗中若見黃氏授之物也者乃吞金殉死傳曰世謂婦人死夫易守節難然人莫不惜其死不數十年而一門死夫者二尚得謂其易也哉



聞黃倉遠善訓蒙課氏女慕貞潔句反覆數千言林氏氣將絕灌以藥堅不受曰死我分也噫是皆深明乎從一之義夫死則死而他非所知也雖然人莫不有一死如雙烈婦者其亦可以無憾矣夫

邱氏林氏夫兄承繼妻寡十九年矣痛林之烈又適己之未能殉夫也一慟幾絕閱數月仍鬱鬱卒昔竊都魏傑殉父東房之死永未貽戚友書曰此家庭極不幸之中稍足叙述者邱氏稱未亡十九年而有觸斯烈豈惟林有以感之哉而謂邱氏亦豈易及哉此固清河家庭之極不幸而適增家乘邑志之光也余既傳雙烈婦松甫學博復道邱氏顛末因附記之

松甫名偉奇承續承嗣弟也

### 增生邱炳春死事傳

張偉奇

邱炳春邑增生號煥甫文案堡人所居地名老虎頭族州處極悍不爲鄰村相友助春垢其族之不見重精神也亟思所以變之游庠後首禁拳勇技擊諸惡習每歲有事於祠輒萃長幼講倫理講之孝弟忠信而廉其秀而良者慈惠讀書親爲督課未嘗責致俯敬然性氣倜儻不屑屑生產爲事又善談論語言鋒發尙論古今忠義事蹟未嘗不感奮流涕蓋天性然也咸豐紀元贛令叢占鰲明府聘爲記室時當洪楊飲馬江漢順流陷金陵大江南北羽警風馳慨然曰范文正爲秀才時便以天下爲己任是豈吾輩伏案蠶書時

哉悉謝舉業窮究鉛鉛之學毅然有擊楫請纓之志焉歲甲寅嶺南盜起杖策謁令周公汝筠請領健兒爲前軍援韶部署嚴明費畫詳密周倚重之既屢敗賊於韶之河西尾搗其堅解韶圍當道叙功擬以復設訓導保薦明年秋周復奉調援吉軍次泰和食盡道梗賊又率大股邀擊其前全軍譁潰惟春獨修部伍而還維時援吉兵敗賊勢愈張新遷巡道汪公報聞移駐南康接募新城勇二千人康勇千餘人謀可爲統帶其人者莫有過春舉衆屬之令由橫石井馳會周軍協謀禦賊時周猶率敗軍退守贛境之介坪也及春問抵萬安而周已由贛郡回康城春以孤軍深入陸馳三百餘里雞犬一無所獲時論才之然軍新集需用戰守之器不及取給於周士氣頓沮而巡道謀利速戰迭箭進軍丙辰春二月拒賊前股於百家村屢有斬獲嗣以糧匱器闕賊又盡銳前驅人莫有固心矣二十九日曙賊縱大股水陸蟻來春即率勇拒敵新城勇不戰潰走春遂生陷於賊賊熱鐵彈置其頂勒之降春不能屈乃以棉具漬油裹而焚之時有同陷賊營之隨勇逸回述其死事之烈如此事聞江西撫臣覺羅耆奏請卹蔭春皆入祀昭忠祠准給祭葬銀兩世襲雲騎尉襲次完時給予恩騎尉世襲罔替長子魁經承襲

### 儘先都司吳廷瑞小傳

吳廷瑞佑朝堡人由行伍入武庠以弓馬熟嫻拔補羊角營額外外委洊補贛標中營外



委道光二十一年果勇侯楊芳統師駐粵瑞隨南贛總鎮長春留營差委候廉知瑞才奏請賞戴藍翎以把總拔補補等都城守汛把總調署左營守備咸豐五年吳憲周貞恪公調赴勦辦吉安郡屬踞賊樂功以都司儘先補用口口撲圍吉郡貞恪娶城固守瑞日夕巡邏不懈六年正月接絕餉匱貞恪死之瑞同日遇害撫憲奏准卹廕世襲雲騎尉襲次完時以恩騎尉世襲固替子桂發承襲

廖啟發小傳

廖啟發潭口堡人咸豐六年潭匪佔據潭口啟發舉家陷賊賊負隅抗拒官軍攻勦累月不克邑紳廖開昇等稟明知縣周汝筠設法招撫潛約啟發爲內應啟發暗結良民之陷賊者編隊伍申明誓同心殺賊約有日矣會謀者送密函爲賊邏獲擒啟發釘諸木逼供同謀者啟發罵不絕口賊怒割之並殺其女

即選從九劉泰成小傳

劉泰成監生西鄉甘竹一堡人名進士敬熙先生其從祖也皆以身爲清白吏後意氣自雄赴義如響排解鄉鄰磊磊如也故身不列薦紳而名重士林咸豐四五年間嶺南盜起糾眾數百人應募從征與前升縣周汝筠克復始興縣城援解韶州郡圍糧勞得獎六年倡解縣圍調集西鄉田勇辦團籌餉與有力焉越明年正月縣境肅清隨周升縣管帶

田勇援信豐敗賊於赤土堡者屢矣席勝銳入中其伏賊又出大股自後砍之遂戰死事平奉江西撫臣沈奏請議卹准給祭葬銀入祀昭忠祠並賜雲騎尉世職襲次完時給恩騎尉世襲固替子順承襲發給執照以守備補用嗚呼若成者可不謂鄉人而國士哉見危授命詩書簪紱者難焉而克以布衣邀世及之榮審其清白之家聲廉吏爲有後矣

花翎都司銜郭景山小傳

郭景山西鄉甘竹二堡人世習農業貌恂恂如婦女而膽氣雄於千夫充當本邑練勇一勇健鬪戰輒有功咸豐十年周升縣汝筠奉調援仁化縣景山於是爲百夫長矣領健兒百人徑衝賊鋒陷其陣追試城根嘯而登者屢賊視後陣不繼競發槍銃叢擊之忽飛馳丸洞其左腹而死聞者壯之先是每仗勝賊衆皆洵洵揮拳起論鏖戰狀山獨嘿無所建白而未嘗無功論者謂有馮大樹風云廣東撫臣覺羅羅奏請卹廕准給祭葬銀世襲雲騎尉襲次完時給予恩騎尉世襲固替

拔補把總劉生發拔補外委蕭惠振合傳

刀鎗鼎鑊之間達義則生守義則死責其不義而生膏義而死此見危授命之事可概責以一莽之夫哉莽夫也能明順逆而生死守之不受威於刀鎗不渝志於鼎鑊尙得以莽夫也朽之由是言之尙義如劉生發蕭惠振二人者固亦有足傳焉劉生發塘江人蕭惠



振潭口人皆以技擊拳勇豪於時雖不識書而當義不能平之事奮拳起鬪卒不以勇狠見惡鄉鄰毋亦所謂古鄉俠之流亞歟咸豐四五年應募爲練勇俱以援解韶圍有功得獎武職六年夏四月潭奸作亂李斌等倡爲添弟會裏會紳民從者如崩振獨遏其族鄰多方勸散而又密與生竄潛約舊部練勇謀殲其魁賊覺連擒生發拷問發無所諱賊怒支解之既殺發密遣黨業在環振廬擒振殺其家屬勒爲會匪振大罵曰誰從汝作無頭罪鬼也賊大怒斷其兩手砍口割舌猶罵不已乃斬頸血漉旗而焚其尸於市嗚呼烈哉事平前縣周汝筠詳請撫憲覺羅耆奏請卹蔭奉旨蕭惠振准給祭葬銀世襲雲騎尉襲次完時給予恩騎尉世襲啓

千總蔡元陞把總蔡元德蔡久發傳略

蔡元陞山行伍考拔南安營外委咸豐五年由把總拔補觀音閣汛千總署中軍守備代理本營遊擊事奉贛鎮阿隆阿隨帶標兵征臨江等匪多立戰功復奉按察使周閏山調征吉安踞賊協守郡城日夕巡警歷數閱月賊窮環攻之力無懈可乘周甚賴之至六年正月卒以食盡不守及賊入城乃約吳廷瑞等格鬪以死

蔡元德行伍道光二十年從征英夷有功果勇侯楊公芳保獎六品頂戴隨補贛標後營額外考拔南安營外委升官村汛把總咸豐五年奉按察使周閏山分勦吉匪不克戰死

蔡久發號玉祥咸豐四年以軍功得獎外委復奉贛鎮委查河道有功拔補安遠汛把總調南安水城汛把總咸豐八年冬石達開率數萬眾圍郡城十一月三十日城陷死之

張大芬郭雲凌廖子耳廖同寅殉難記略

張大芬文峯堡人性孝友事母未嘗闕甘旨兄弟弟首同龔怡怡如也咸豐六年之亂土匪衝其族黨助官勦掃首火其廬芬因亡伏贛邑胡盧洞之林菁深處俄爲土匪逆獲縛送潭口老巢賊目何名標置芬筆硯勒作手書招其族紳之在官者芬怒擲硯擊賊中其左股賊目咆哮大恚滅送塘江大巢請殺之稱偽尚書名程瀛者復釋其縛自爲手書令芬歸致其族芬又碎擲之賊終不能屈乃斬芬首縛書辦髮間而於陣前擲歸其元時年六十有一矣前縣周汝筠以未請卹保獎其子昌銓以從九品選用同治四年附祀省垣昭忠總祠

郭雲凌文峯堡人家厚於財六年之亂首捐稻穀百餘石募勇辦團賊聞擁衆圍入強以黃巾裹其首勒書姓名入會凌却罵之遽自刎死

廖子耳潭口堡人家巨富爲賊所利又因叔祖開昇總辦鄉團捐助官餉奸匪益深銜恨六年之變耳隨家屬避廣東偶爲土匪截獲械送樓梯嶺大巢勒餽財物榜繫交酷耳大言曰吾不能苟求生命以助盜糧也賊怒割舌支解之同治四年附祀省垣昭忠總祠



廖同寅份生潭口堡人咸豐六年全家陷賊中計不能脫遣子福長密約宗黨圖反正有成謀矣俄爲賊覺被捉窮究同謀終不吐實父子遂同遇害然當時賴以全活者蓋不止數百家云

廩生邱觀光廩生盧由庚殉難傳略

邱觀光郡廩生文峯堡人性端謹有文名因抱伯牛之疾索居郊野猶時把卷吟詩以寫其抑鬱不平之氣丙辰潭匪滋事大遭焚掠全族屋無完瓦光自以爲殘疾餘生無怨於賊每遇賊輒歸正賊凡舉動時爲密信告官軍賊覺勒光蓋髮徙居大怒罵之遂遇害盧由庚邑廩生塘江堡人咸豐紀元應舉孝廉方正以詩古文辭讓於庠八年大庚令黃彙庚聘爲記室勤辦團練甚倚賴之是年冬石達開統大股圍郡城知南安府葉球委帶團勇守備寨賊窮仰攻暗掘地道以入城陷與閩城官僚俱死於事

烈婦張氏全家殉難記略

張井生妻某氏連塘堡風門坳人咸豐八年新城之役石達開大敗官軍各隘防勇潰逃矣氏聞風門坳兵敗疾避入山忽爲騎賊追及見氏少艾堅逼辱之氏計不免佯爲從賊賊喜遽擲其刀與氏坐地而戲方談笑間賊不及防氏遽提刀創賊不及斃遂爲賊殺盡戮其家氏翁張學銓姑李氏夫井生子及夫弟妹一家六口同時遇害

胡洪標蕭先尊蕭先明蕭先福黃明春合傳

軍行必有敢死之士事危必有濟變之才當存亡在呼吸匹夫挺身而起至於喋血疆場膏身原野不之惜得不謂之烈士乎哉然剛烈如胡洪標五人者可記焉五人者俱南康人軍興以來應募充爲練勇皆以從征泰和萬安踞匪有功得獎六七品頂戴咸豐五年前縣周汝筠奉調援韶五人俱以百夫長稱名戎行拳勇技擊爭爲雄長不下而號健善鬪功亦相埒韶之河西尾者賊老巢也背山面流守以鉅砲相持彌月屢仗失利軍士莫有固心矣五人請僞爲賊深入其巢俟賊拒戰從後砍之呼嘯大起我軍反旗掩殺乃大勝賊而五人身陷重地不能出遂皆殞焉



... 言固心... 人... 國... 原... 人... 取... 隨...

